


顏氏家藏尺牘

卷

14

1475

76



門 1 4
號 1475
卷 76

昭和十五年
二月二日
購求

顏氏家藏尺牘卷三

劉良俟攷

得觀台光如挹紫芝坐春臺之上温醇和厚祖風宛在
大拜有日分榮不小忻羨忻羨仙源三十載未到孔方
訓近日如何同時知交不及細訊東裝東渡溽暑枉顧
無勞軒車遣童叩止蠡城秋爽賜光爲暢相陪看山爲
大快事也貴門人數數相見泛而不切不過常套所言
乞卽惠瑤函向商此事如妥本役自來叩見也區區圖
維敢不黽勉念昔在尊先祖教下患難相依豈比泛常

哉尊札乞草付來手斷不敢勞遠顧居居於往返俗套
切訂上禱依依不旣劉良頓首不另具單

陳少宰一炳

自年翁之歸也無日不矚望東山當風雨晦明思一時
共事之雅每爲惆悵者久之昔者叔田有無人之歌闈
闈有匪存之咏詩人之旨良不誣也讀孝靖公表傳忠
概孝行爛於日星令人想見復聖之家教平原之遺烈
但恨不及親炙休光聆其餘論猶幸而獲讀表傳悉其
生平真可謂不世出之人矣今聖天子正作興忠孝他

日採風者上之將錫之諡光史冊以永垂不朽甯一鄉
之私諡而已哉聞之陽明先生居喪之日肉食不戒曰
養其身報朝廷以顯其親此乃爲人子之大孝愚亦敢
以此進年翁天氣暑溽讀禮之間望節哀強飯握晤尙
遙臨穎不勝神逝

錢中書芳標

青瑣追趨時聆塵誨醇醪饜飫鄙吝都消自台旆南臨
忽更裘葛屋梁落月吾勞如何弟以尸饗久媿不獲已
乞假南颿適丁東省慈幃之變愁緒如絲亂不可理蹉

踣跋涉冬仲始抵里門先在潞河與家兄握別曾有一
函托呈清覽因歸心孔迫不及紆道面奉并語濶悰二
水三山惟有神馳不置茲當奴呈上代候崇禧卽日令
其北轅家兄處報章並祈卽發來手何如呵凍率勒臨
穎不盡瞻遡

數載西清得佩教益迄今寤寐依依弟自里居侍養以
來匿影菰蘆不敢以野人姓氏達輦下故人疎懶成癖
恃知愛之深或勿加譴訶也茲值內叔董蒼水北轅便
附荒槭肅候近祉蒼老爲文敏總憲兩先生文孫舉名

孝廉做鄉陳李以後文章領袖指爲首屈弟廿年來雞
鳴風雨詩酒倡酬之交一人而已今遊長安諒老年臺
神交有素必傾蓋如故商摧風雅披寫胸臆愉快何如
詞刻二紙寄呈斧政阮亭先生近已有一行道濶不及
再瀆同人前均祈一一呼名燈下率勒不盡縷縷
程提學汝璞

別後星馳北發途次山左而病劇矣停舟請告荷允言
旋一路間關側聞新猷懋著行旅之人無不嘖嘖頌之
病卧中欣羨當何如也弟所乘小舫原屬虛空又因屢

歷驚濤復買一葉以備不虞毫無所載祈老年翁俯念
歸省心切卽賜放行感佩之私容當崙人叩謝舟次草
草可勝神馳

張孔目貞

貞側伏草莽卽聞老先生日坐廟堂進退百官政術而
外則跣跣藝苑上下千古真爲一世龍門仰止深懷豈
一日之積哉但以敝屣蹙蹙未敢躡進台階乃承老先
生不棄葑菲納之藥籠沐殷子之清風挹山公之雅度
至今夢魂猶在冰壺玉鑑間也見委七印不敢匿醜敬

鐫呈教幸一笑置之草堂一區欲倩法書倘不見拒振
筆一揮增榮益觀當出於尋常萬萬也不揆鄙陋妄意
仰干所恃宏慈統加亮宥耳匆匆草削不盡所懷春明
北上更佈區區晚弟貞載頓首勉厚堂求作行楷十月
下浣當有人去不識可能卽得否貞又拜懇
貞偃蹇支離人間長物方爲時所共棄老先生獨篤念
世誼惓惓有加若忘其骭骹瑣尾也者貞卽頑悍不自
知聞者當何如其榮耶數月以來雖未敢以寒暄無益
之語輕瀆清嚴然而酌恩徇知之一念亦何能自釋於

懷特顯一介代候起居想福履愈增旂常日懋爲海內
蒼生所共慶政非僅貞一人之私幸耳附懇者做縣父
母旣以罪行前月廿五日必已得人計其出都當不在
遠仰冀鼎呂以賤名相囑卽體分濶絕無可通之理亦
望託其鄉人喻以尊旨則貞受厦庇已莫可量數矣貞
塞兌杜門甘爲夔伏得其知貞生平不至過相鄙賤於
願已足無他覲也夏暑方溽惟爲道爲天下自愛不宣
晚弟貞載頓首

朱制軍宏祚

都門別來回署卽有繪圖之檄二十餘日之內奔走二
千餘里僕馬勞費大火正流其苦有非人所堪者定限
迫促不容少展以五六十處之州縣城堡萬餘里之行
折程途欲其遍歷山川形勢河道源流考究典故繪畫
精詳豈不大難大難相愛如老年臺先生其何以教我
得免於無過耶昨接孫赤老手字已得列正印老年臺
先生篤念夙誼古道如此均感弗盡揣此附謝外具不
腆伏惟垂納

張祭酒永祺

素車東發忱悃未將睽隔之光倏焉三載翹企之私無
日不神馳左右知垂注正復相同也使來接教深佩注
存滿擬即日還朝統均正位爲當宁之慶不第世誼分
榮乃以尊體調攝北上稍稍然區區向往之誠日夕以
之至不佞行能固不如人而官資亦在最後量移未卜
恐有負知己期許耳爲之奈何因便附候闔宅迪吉不
盡願言

成給諫性

去春闈中同事丞承教愛別而南也不勝尊酒論文之

思弟問水雙江帆影落落如晨星雖拮据萬狀尙不能
充額爲之奈何老年翁貴關想大德福命之所歷必有
遠超於荒權者亦可慰同人之懸切矣接尊翰每晤孔
令親訊及知無有不得當者盛侔旋值弟抱疥癬之疾
呻吟牀褥間草草奉復臨穎曷勝馳慕之至
袁提學時中

昨日不得入直承門兄照拂爲感舍親五十誕辰欲借
光燕許前日弟會面懇祈門兄推愛勿吝珠玉則弟與
有榮施也顛懇顛懇舍親吳心樞紹興人丁酉武榜其

高堂具慶有子三一在庠為人甚孝友有俠氣亦流俗
翹楚也此聞弟時中頓首

茅處士麀

前者樞謁不獲親領教言枉顧又失倒屣自愧無緣殊
深罪歎乃蒙華翰下頌又值抱疴于友人齋頭不及裁
答初二日竭誠奉候此復上顏老先生大人台侍晚生
茅麀頓首

沈明經季友

屢蒙高誼極應奉命但鬱鬱羈蹤留此無益一動歸思

便如走丸矣十五日斷擬早發尙容作歌留謝雅情未
盡修翁老先生大人吾師小姪沈季友頓首

汪處士耀麟

去尊寓遠甚不得時相過從殊懷戀戀俗冗尙未攀教
容集諸同人作竟日談承賜太翁老先生表傳讀之令
人敬佩高風豈近今可得耶先君行述墓志附呈台覽
適送拙刻時未敢附上恐以爲不祥耳豹老紙價即致
之修翁先生大人晚弟耀頓首

雨中未得走候疎畧之罪知不可贖十九日奉攀大教

蚤至是禱送徐健翁詩會脫稿否同人俱齊崙候佳篇
歷卷來冊一葉乞書其半彙成卽寄京師至望至禱修
翁先生大人晚弟耀麟頓首

顧處士宸

頃見老年翁七言絕句真絕調也已借重六首入拙選
矣更有佳詠幸多多惠教縉紳借一看年家教弟宸頓
首

嘉肴旨酒深費主人之心偶以小疾未能久坐竊自憎
其薄福耳此刻適櫟翁訂晤尙欲一進城不敢再謁謝

昨絕句一冊併大作一紙幸卽發付有貴省名詩惠數
冊更感侍教弟宸頓首

令叔金陵諸詠可錄者多尙未細細選定弟此選最嚴
毫不徇情面故錄出者絕不示人今遇知音敢以絕句
一種呈正尊作亦在內看過卽付還可也令叔可一晤
否弟宸頓首

曹中丞申吉

寄舍親一函幸攜至江甯覓便與之渠僅一細民不足
煩照拂今奉銀五十兩中分十兩寄姚親其餘四十作

置衣幣之用如有不足暫借用可耳幸驗存之遠行不
得祖帳一握手惟長途自愛江甯藏書家如有曹能始
十二代詩選幸覓一部見寄餘不一申吉拜懇

董處士樵

蒙賜鴻篇兒婦借垂不朽感勒無極先此鳴謝容晤叩
不盡修翁先生知我小弟樵頓首

高檢討詠

卧病經旬初十日始得小愈老師台委緣貫長班送至
趙老先生長班宅內沉閣許久前晚始送到卽已力疾

爲之但未及脫稿不敢呈覽至於筆墨疎謬姿質駑劣
殊媿不堪鞭策統冀慈原可也門生高詠頓首啓
歲月遷延久疎函丈緣貧病交侵日坐愁城苦海故也
三詩脫稿恭呈台覽應酬填委殊媿不工乞老夫子加
之魯墨運以郢斤可耳王阮亭公祖前面徐老師甚相
督過云有見顧不答之罪蓋王公祖榮補時詠曾以紅
全謁賀三日後方蒙寵答此後別無見顧之事矣賤貧
之子願交鉅公足跡屢及門而閤人辭焉則有之矣豈
有長者車騎光臨乃反悍然自外者此可以理度者也

或比時未面司闈忘登掌記耳晤間乞爲叱致感甚幸
甚門生高詠啓

汪編修琬

今又製乳金印色少許可賜一盒分用妙極可以甲天
下印油乃十竹齋者不盡佳容自製好油奉鑿金扇二
柄借用嗣容償弟可也弟琬頓首
別後卽將註過諸章送山子趙親翁云得面商字之陰
陽款致方妙弟卽令親叩晤教希善待之此公忠厚人
也勿吝見是禱弟琬頓首

路博士鶴徵

日來屢叩寓齋值老先生探梅山中未得把晤談心悵
悵殊甚拙刻已遵台旨借重尊評特印就呈覽妻弟超
念章夙仰老先生風雅主盟渴欲奉教左右奈彼此往
還不獲謀面殊深緣慳茲又迫於掃墓偕晚鄉行渠所
送文集思得玄晏大敘以光梨棗特囑晚轉懇不識可
慨然俞允否扇三柄并求椽筆一揮統俟返舍時走謁
面悉不盡晚生鶴徵頓首

昨偶過湖上知老先生自昭慶移寓渴欲趨謁朝來竟

為兩阻悵快殊極來扇求椽筆寫小行書畧少霽面謝
不既修翁老先生大人晚生鶴徵頓首

王處士暉

渴欲一登龍門面領教益不謂久病未痊遂遲晉謁辱
承不吝彩毫兼賜尊刻何啻百朋之錫耶尊照領到容
俟精神稍旺當草數語請政也率復不一晚生暉再頓
首

李巡按植

別來猶得借庇以叨主人之惠但日望返駕終以不得

常侍左右為歉也屈翁老原約一二日間同赴雲間一
晤不謂商議間忽覩來諭開視捧讀如親謦欬但制晚
何能而克當此慙慙垂念耶州中事已經子老書內說
明亦無容再陳至劄付一事會屢託羅致全無行之者
奈何奈何春色撩人愈增客况伏惟珍重是所願也上
復並候老爺萬安制晚生李植叩具

周經歷在浚

昨家兄手摺承留意至感至感明日大收家兄亦逐隊
而往總乞必當知先生定不膜視也再瀆不一修翁先

生晚在浚頓首

昨暑中褻尊罪罪稍涼當圖再聚也大刻拜領謝謝神
識碑小說書目適正馳上使來藉奉諸容晤悉晚浚頓
首

聞台駕有真州及勾曲之行故未敢走候此時想已歸
矣天氣漸爽稍遲尙期作郊外之遊也惡姻緣小說前
呈五冊想已閱畢幸付來价因吳門近已梓完來借一
對欲寄往耳諸容面教不一修翁老先生晚在浚頓首
陽和初屆瑞雪芳霏想老先生擁鑪吟咏坐中佳士共

爲欣賞也若蕭條野人徒多戰慄耳承委拙筆呵凍爲
之未能如願仰求諒恕容圖躬叩不悉上修翁老先生
閣席晚阮頓首二紙小印并完上

昨奉叩承老先生教誨飲食謝謝二章完上媿以雕蟲
刻鵠之技仰承龍翔鳳翥之文敬附圖書藉光不朽知
茯苓芝之遇合洵可千古也不揣疎拙於尊銜內妄增
一字以配其文不識有當台意否泥湓不獲躬致請益
草此代面不宣上修翁老先生閣下晚生阮頓首
李方伯之粹

巴里之音塗鴉之筆皆足為大方絕倒但以願教之殷
不暇自匿其醜惟老年臺不吝郵政足仍雲誼容晤未
既弟粹頓首

龍司馬光

辱年翁骨肉之誼故亦不敢自外但謝去筆墨已久所
見未必是幸諒之弟在此尚有十數日便道幸常見訪
也兩詩統壁上修來年社盟翁侍史弟光頓首

鄭處士准

昨藉吳老先生獲登龍門深慰鄙懷更蒙垂青不棄隆

誼殷殷真沐我於春風中也謝何可言拙染一冊恭呈
大教幸莞存之案頭必賴青雲游揚私喜葑菲之幸但
媿末技不堪為說項之資耳不盡欲言顏老先生大詞
伯晚生鄭淮頓首

宋學博實穎

聞先生歸寓未及過候為耿歲除無以娛客小物二種
聊供清翫幸莞存之春聯祈右軍一揮感荷感荷餘面
戩小弟穎頓首修翁老先生

汪處士徵遠

歸讀老先生翰教卽與周梓人說明山志暫停數日先
囑從事大集今日因送吳山大師龕子過真州不獲面
復歸時容趨教不盡修翁老先生制晚徵遠稽首

曹處士重

春雨不絕阻我良晤念可知也昨聞老先生庚韻詩已
成祈卽惠教付刻夜來觀堂分咏錄供噴飯幸斧削荷
荷尊筭畫完附繳敝扇定已揮就并望發歸餘俟趨對
以悉修翁老先生年臺大人晚生重頓首

孫燕

俟考

適得拜觀儀型後學獲有矜式大快生平奉懇藩臺一
札求先生鼎力卽爲轉致倘獲寸進皆屬栽培之力不
獨燕與諸生永矢弗諼卽家君亦爲心勒更乞索一的
示愈沾作養宏恩矣恃愛悚仄伏冀原宥修翁老先生
大人晚生孫燕頓首

耿編修願魯

連羈俗冗致疎走晤深用悵然茲啓者江南新援例監
生沈光竣目今文在貴衙門未得到監敢求老年翁留
神俾旦晚送監佩德不僅弟已也諸容晤悉不一弟願

魯頓首

沈泌 俟考

屢混興居殊增悚仄岱宗之不遺培塿於此見一斑矣
恭聞田大文宗於今日起馬回本衙門所懇二呈詞能
卽趁今日鼎致批發尤爲直截了當而舍妹夫梅生之
激感高誼甯待言耶率稟不莊皇恐皇恐年家晚生沈
泌頓首

黃進士之鼎

拙卷呈政所言傭書者乞代爲一問容謝不盡啓修翁

老年臺卽太史弟之鼎頓首

柳孝廉燾

雅集定期候年兄酌示以便遵行是日邀大年兄弟當
具柬再同年兄共帖并請王鶴汀年翁一敘也主客單
附覽分金五兩奉到嗣容補送不盡弟燾頓首

魏太守麟徵

昨承鼎呂允賜解推翹切無似今爲時已迫諸凡未能
就緒敢求老年兄爲弟多方設處以濟然眉弟至充時
必持送潭府也耑此瑣瀆不一弟麟徵頓首

惠明府周惕

比日多病畏熱有失侍教馳企不可言新製已付刻未
急欲諷詠不能侍刻工之竣得以付寫後藁見賜所至
禱也連日擬錄客中文字先呈一二義幸即改抹付下
詩說上卷亦求擲還下卷錄未竟也晚惕再頓首
刻樣極佳連圈似不可少但不須滿幅前輩選本但連
圈佳處餘俱不用圈點評語載後應署姓名且去其無
意義者若大人先生不便書名可以不錄其評蓋論次
文章原屬後學之事如李漢之序昌黎子瞻之敘歐陽

是也今雖制義亦宜略倣其體附此奉商不審先生以
爲何如惕再拜刻價幾許一百便乞示知

刻工令其詣府自言可用與否亦唯尊裁示之詩說及
制義幸即付來舊刻一紙并附請正令弟先生近藝肯
一賜讀否念始延試卷已不刻二有札會及此段也刻
下將養病蕭寺恐疎問難達且晚容趨侍且聞一言自
廣不宣晚惕頓首

前日承翰教即便奉詣直尊從出門不敢請見若今日
得暇當即相造且端策一問詹尹否則異日趨教可也

特此晚惕頓首

每思趨侍輒復懶廢仰止之懷無時不依依也冀讀新製賞心不已私心追慕此種文筆恨學力不追而有司尺度又復束其心手局趣若騶之隨靳可發一歎也偶錄三義就正有道幸輟忙塗抹卽付禱禱扇一枋求書近作餘語另布晚惕頓首頓首

翰來正直出門故信歸不及取會尊意卽語廣平公渠再四辭讓卽託致謝且請徧告貴衙門諸先生奇韻暫附上另日尙欲借鈔也晚惕頓首

日來甚無事出外犇走拉友朋清談而已頃叩謁直駕將出不便請見特屬鈴下致語漪亭先生定已得選恐彼尙未知曾有書違之否聞兩日正在通州然否示之晚惕頓首

祖氏園乃在東柵南湖此刻卽行不及奉別希望後日嗣音筆賈陸孔庭兄爲人誠實可交其筆在吳中諸工之上進而試之何如以後若有書問孔庭可託也特此晚惕頓首

日來小冗性不能堪致脾氣作惡明早卽同從游者養

癸卯家牘附錄卷三
二
疴祖氏園旬五之期乃得還也近作一首附正幸輟忙
塗抹立付或晚間奉別時走領尊刻若印過亟求賜讀
主臣主臣晚惕頓首

兩閱月不獲趨侍企懷何可言尊刻計已告竣幸一一
賜教八月初入城當覓快對也做門生宋基業廣平相
公猶子前曾在貴衙門考過州佐刻下復就科試令彼
造謁門下教之不一晚惕頓首

塾人性嬾病與之會遂爾廢棄人事雖仰止如老先生
亦不能時時趨候他可知矣讀來教深感雅誼旋聞之

孟夫子明日旁午當來叩謝且欲望見顏色幸假片時
之暇略一接席晤對頃當知其人之長厚也新製送還
詩說及雜文望卽賜下時文若未批抹明日來領刻工
卽日令其呈樣也令弟先生久未得晤極念極念希致
語晚惕頓首

久未入城聞尊體不快極懸懸嗣奉手示始知病瘥此
亦未足爲困經云夏傷於暑秋成痲瘥略服消暑湯劑
調節飲食指日可愈也南人慣有此症絕不經懷北方
頗不爾大都一寒一熱不能少忍反增病於快意中耳

然否然否萬望寶賚自愛尊刻求卽賜讀近來亦有經義幾首然無足觀外間議論痛惡典雅奈何奈何附此發一笑令弟先生統此致候晚惕頓首

尊酒論文平生快事但過費梓食差爲不安敬謝敬謝大著傾到容屏除塵俗悉心細讀也賤子持論常謂古文時文不從六經而出總無是處漢唐人作注疏卽一字一句必考證出處貫穿諸經柳子厚所謂溲釋融洽與道大適者今人未曾夢見安得懸尊文於國門使俚俚無見者皆知青天白日之清明耶欣賞之極發爲狂

言知執事不以爲罪耳鄙著尙有可請教者惟時文最少然旣命之敢不錄正旦晚趨侍以悉不宣晚惕頓首制義若得盡讀豈非快事入京來未有所獲但得侍教先生爲平生一樂以賤子鄙見時文終非傳世之業以此種心思手筆爲六經作箋解不更快乎歸熙甫先生言語妙天下輒自鄙其時文不足爲此非無見也愚人狂論未知有當高明萬一否詩說乃是常語何以得蒙欣賞慙媿慙媿刻下幸暫付還另日再錄詩攷及他經解一并呈正也舉世碌碌知音者希非執事無以發其

狂言勿罪勿罪主臣主臣晚惕頓首
吳侍講元龍

夜來見我兄形容少減心竊憂之西風獵獵正宜鍵關
靜攝以俟復元况病加小愈尤當慎重乎弟凌晨早發
更無遲回但離愁萬狀欲去不忍晚刻當偷閑再叩以
悉別悰也名鑪甚精何當割愛台命詩切誼不敢辭第
家藏一二儘堪撫玩仍留長兄案頭如弟日侍左右可
耳若以他物見貽弟自不敢璧也可發大噓筦籥乃衛
生之寶再拜珍藏此中所以尙容面求提命束裝匆匆

先此暫復鳴謝不既小弟元龍頓首

知己分攜倏焉三月懷想之私形諸夢寐恍然若日侍
左右離愁千萬實非毫楮所能罄述也潤州返棹以老
親多病晨夕焦勞每從吳門訪醫輒探老年長兄返旆
之信寂無確音懸念不可言適遽使至審悉台社平安
踴躍無量拜讀瑤翰慙慙懇懇愛我憐我之誼溢于紙
背中心藏之何日忘之銀籥檢入尙奉爲枕中鴻秘不
敢輕以示人倘前津得渡決不忘老師傳心之力口籥
似有微驗第因作輟任意未能呼吸入神手教勉以力

行從此益加奮勵念茲在茲不敢辜大恩也感謝感謝
墨妙甚精懸之座右如對芝宇永永勿諼矣硯兄前四
月間有信來囑詢起居望駕北行甚切俟月杪便鴻至
彼當再囑潭府種種不止台諭所云失案一事也年兄
安心消暑不必內顧縈懷時當炎溽百凡爲我道珍重
金壇新樣雲葛二端官扇一握聊誌區區餘候文輅過
吳閩時買舟細倒濶縷不一小弟龍再頓首謝
兩日正擬出門以文旆山遊未返用是欲行且止登臨
所至定多佳咏少頃當趨讀并悉縷縷也二冊裝演告

成端伴奉覽其工值弟已給之不必重營清慮二套明
後亦可得先此代叩不盡史處竟爾寂然必祈竣局乃
妙并懇

極欲叩晤以事機尙未有成緒用是逡巡然行止亦只
在且晚也前小价事當事未見施行豈爲奸滑沉攔耶
乞年兄速命尊管再往力催否則小人道長我輩氣沮
矣奈何奈何初十日候駕蚤光并禱不盡
瑣事重荷鼎呂得以雪忿感且不朽聞羣小正在禱求
用是避嫌未敢趨叩駕行尙宜少紓其期祝祝台冊題

就呈政操斧般門殊不自知其醜矣冗次草草不盡
年兄有意西來否弟在寓鵠候幸惠然是禱前懇亦出
不得已望年兄留神再囑必於薄面有光乃妙朱雪田
風流名士也皈依甚切聞駕今年有當事之席或以此
情節致之不審可否惟台裁之其來札附呈清覽不一
同作天涯之客承年兄臺種種渥愛入人肺腑感激殊
恩夢寐以之弟自二十日叩別後扶病遊行至二十六
晚刻始抵里門一路跋涉而嘗聞所患陡然奇瘧其痛
楚不可當至吳門卽覓醫診視云此係濕痰流注非藥

石可能奏功必用針治乃望友全目下計無所出遣人
赴浙中延醫吉凶利鈍俱未可卜或叨長兄福庇不致
長謝人間得他年再瞻色笑深有願耳所事其父母兄
弟俱心悅誠服奈閨秀八月中染患脾症久痢之後元
氣未復至今猶支離芙蓉繡褥間一時萬萬不能迫其
遠道弟恐此中或有他飾特令小婢親往驗看一一不
爽何佳人福薄而才子緣慳一至此耶序逼歲寒恐征
輶不能久待或俟春和氣暖台旌到都之後卽命使乎
來迎或以山川阻修往返費重爲嫌另尋別章行止俱

候妙裁非弟所敢出也萊兄至今未到不知留滯何處
前件大費苦心竟爲愚弄觀其動靜仍兢兢於舊習奈
何奈何容俟萊兄來時再與熟商或令有所歸着則可
否則棄之不甘也菲物肆種奉佐長兄清玩亦千里鶯
毛之意祈叱存之舟車漸寒途中萬惟珍重保養倘遇
南鴻之便不時惠我德音至禱至禱病中倉卒作書不
盡萬一仰祈崇鑒臨風馳戀之至年小弟名心肅
晨起正擬趨叩奈酬應無少歇而腰間發腫作熱深悔
不聽長兄之言以受此奇苦明日遂杜門謝客延此殘

喘接教知有同心我兩人當力圖靜攝以俟復元可也
長兄精神雖旺然外實內虛亦爲可慮節勞保重至祝
至祝旅邸同病之憐感銘肺腑敬謝不盡小弟元龍頓
首頃江甯郡守賜顧譚及曹澹翁先生爲逆所害一門
盡節其言甚確末路誠可蓋愆也并聞

夜來酣擾幾忘旅况非年長兄愛弟之深不至此感切
感切晨起瘡勢略緩尙未能酬應故不敢出門想荷慈
鑒午刻覓得一花望年兄拉萊翁早過快敘作竟日之
歡幸勿他拒至禱至禱萊翁處乞卽訂之切切在公家

兄弟已走札約之矣并聞小弟元龍頓首頓首

頃承教因對客失復爲罪賤痾疼楚如故不發不消醫
生束手今惟靜以聽之更無他法台體服藥後可得平
復否舌爲心之苗心火盛則見諸腫熱黃連乃勝藥也
不審方中及之否旅病交營歸心如箭明後當叩悉縷
縷大駕萬勿出門祝祝小弟龍頓首

痛楚場中想及長兄咫尺消息時通煩悶亦去八九矣
方生平平頃江甯郡伯送一醫來頗有道理看晚間動
靜再當馳報左右以慰諄注尊恙似外感居多萬祈靜

攝以節勞清心爲第一勝劑弟歸思甚切接教又不敢
遽返容面商之小弟龍伏枕頓首

台恙聞已平復尙祈益加珍攝慎用飲食爲上勿過啖
也昨內科劉兄診視弟脈氣血兩虛氣盛則血行服藥
後病勢已去其半矣倘今日過尊亭幸再致其來晚刻
賤體略可展舒當趨叩九頓也附謝不盡小弟龍頓首
敝相知鄭桐原兄高士也長於宋元名繪昔在王孝翁
幕中弟深服其學行望年兄進而試之前臨別時曾爲
特薦卽此兄也留神汲引切切小弟龍頓首

頤劉兄來知尊體已全愈不勝慰悅刻下宜大補元氣
不宜再用尅伐之劑揀參少許前敝房師從都門郵寄
者其味精厚乃真土木也敬以奉用幸照入賤恙將痊
明後或可出門卽圖趨叩不盡

早承手示以高卧失復罪罪賤恙瘡勢少退尙未能頓
消因日來服破血藥太甚元氣尅削脾經遂致困倦卽
欲不伏枕不能也台體初安萬祈保重昔人云養身莫
若寡慾誠爲良藥諒長兄必不以鄙言爲狂瞽也祝祝
德州到省不遠再圖快敘正未可卜耳小弟龍頓首山

陰雖執法然未能大快人心昨已發府再勘矣客晤悉
之并聞

李太守鴻霍

江湖散人忽來京洛正借因依良友消遣歲年乃老年
兄及子綸兄相繼言歸望望停雲不啻失左右手每欲
寄候苦無便羽讀來翰慰契濶矣弟以不才潦倒兩年
來居然教讀老生此中况味局外人未許問津源源新
例襍沓而來財無卜式遇則馮唐積薪之歎將不知何
所究竟袁杜少贈句有云白首爲郎猶絳帳那得不令

人感慨去年秋例得分校自謂清正之操可沽名於士夫而孰意反因以得罪雖我輩中人無一不諒其無他而讒忌之口亦難盡泯既不圖利又不得名甚非自命之初心矣此中委曲子綸兄能悉知之因年兄骨肉之交故并及之大年翁不專函孔年兄許并祈致聲臨池依依不盡

別離愈久懷想愈切自入春來屈指老年兄抵都有日謂可朝夕談心接來翰始知行旌暫稽湖洞殊深各曹壅滯多端獨貴衙門升轉甚速年兄宜乘朝氣扶搖直

上勿徒久戀東山也吾鄉大槩無兩做縣尤甚深慮人情不靜不但一家衣食之計頃聞貴郡秋禾頗盛乃亦枯旱至此耶丁巳之役可謂公慎無他而讒者之口猶有煩言浙中真屬弊藪幸借同事諸君子廓清殆盡而好事者又皆歸功於區區前所謂求全之毀後所謂不虞之譽也獨是散曹末品當此人情世事上下交困之時於花花世界中猶然冷落以歸此固人所不信卽弟亦初不自信耳便道里門侍家君膝下者月餘又健壯善飯尚能步行二十里差慰於懷弟連年爲典籍所累

形神疲憊竟與詩書無緣偶爾涉獵都不濟事近中博學鴻詞兼之年家子弟選館多人極盡一時之盛對此同學依然故我不能不有馮唐之慨五月間第五小孫生則弟落寞場中佳事耳題名并全卷呈覽餘容令兄先生到時再寄不宣

服官以來稔知至性篤情脈脈彼此相關者年兄而外指不數屈故自建節以往不禁離羣之感久欲一函通候而不得便惟有時向恠兄問訊前知有西清故人之句乘車戴笠之誼何以異是新任江甯令海嶠年兄束

裝匆遽未及一字帶致台端江甯張守亦未修候海兄爲念年知交幸推分及之翰到不啻面談喜極欲狂詢知近履佳勝慰懸切矣關署雖清而詩酒江山佳興勝緣收攬殆盡大是人生樂境閉戶可以讀書開門可以積德持身報國俯仰所樂我輩胸懷當不徒溫飽着脚何如何如弟於明年之冬後年之春夏計當升而且內但念父母年高急欲圖歸侍養已告暫假二十餘日所以未卽遞呈者因此時衙門仍復舊制當年曾有三年咨部候陞之例如果得妥則明年正月初七弟卽滿期

大約衙門內無一善况恐此事亦成畫餅但既有此機不得不稍候數日以定行止耳任仲玉年兄現住尊宅行卽詢之單年兄行時曾以年兄椅數把條卓一張寄弟處弟如家行當轉寄伊翁老許獨美人屏弟欲攜之而去聊作金屋真嬌年兄遊名勝地眼界大濶之後視此畫或土苴矣一笑澹兄處行致台意中情縷縷不能盡及且有不便形之紙筆者統惟照鑒神往不宜弟霍頓寄

北埜子綸兩門兄下棋得錢數百作東道吃了登高今

子綸已傳進署而玉乘子山左珣又復爽約不至弟與北兄兩人如何吃得許多且登高未免太寥寥幸速過爲妙弟霍頓首

敬啓者王冰壺夫子連生兩孫又值其次公子進學弟以及門被同人以詩裒屏爲賀如此大題目又衆耳衆目所在自非名手如吾兄不可爲光明知年兄不輕操刀而又正當公務繁多之際弟深體此情故自入都以來從不敢以此等相干事迫於不得不然千祈年兄走筆一揮且初十上屏望於明日賜下斷勿見拒爲感如

不見允弟當親至奉懇矣不盡弟霍頓首
榮行的於何日耶舊年以五言杜詩一套求選不識已
看完否暫祈檢付弟霍頓首

日作教讀事不得與知己故舊朝夕縱談苦情多端憑
誰訴語初四阮亭處陪弔是日同事否弟九年覃恩一
軸已到部矣當時弟卽假歸未領執照無憑往領封軸
昨承慨允代領幸留神容謝不一修翁老年兄弟鴻霍
頓首

周處士碩

去人持手示旋開讀如晤極知大費曲折更見老先生
不以疎遠而忘故人也感甚感甚承諭都中一遊足徵
始終摯愛第以家累縈懷且值此粟如珠之歲目下雖
欲往而未能以待來年躬叩大教何如尙冀留盈尺地
容野鶴側立於階前爲幸或者捉筆賣手借大人之德
可附不朽定可知也臨池北望依依晚碩頓首

鍾參議朗

客歲小僕南旋荷老年臺深情過愛種種使人刻骨做
役到都時適值差回到部凡所傳命俱已銘之心版夫

何新正留神訪問絕無至者心壹怪之及至巡試商洛
時晤令親孔涵老備道顛末竟因機緣相左垂橐而返
弟聞之汗淋漓背不知所託何人乃荒唐至此使我何
以自贖也孔涵老竭盡心力止得二百章報命其家報
中想能詳悉耳弟試事粗完循例解卷端令敝役叩謝
并致歉仄老年臺文章道義久爲吾道宗盟今幸主持
或可邀庇百凡上下左右還祈加意照拂非筆舌所能
盡者小僕晉叩外致芟芹非敢謂已盡區區更望茹鑒
秋冬間圖報不旣晚朗頓首

承委駢語適賤冗蝟集未得塌管值路湘舞舍親到都
因爲乞憐振筆立就泉湧露垂頗稱工敏湘舞聲華才
望敝鄉推爲祭酒不第十倍晚朗已也不以實告則是
藏人之善而且以欺吾知己矣敢以原稿呈覽湘老係
葉芥舟受業素慕老先生風雅想芥老必爲先容則是
稿亦屬士見大夫之贄矣徵詩引亦卽草呈諸容晤悉
不一前所商已繕一稿俟查確面悉請正也
獻春叩賀後曾再過問奇俱值公出不得一奉清揚悵
惋無似辱委壽言逡巡再四先生騷壇哲匠何忽問道

於盲不敢方命強爲屬草然一見大巫神氣盡奪鮑家
累句觸緒紛來先生見之必當掩口盧胡也媿絕媿絕
暇卽走訪面旣不一德翁先生年臺晚弟朗頓首

秋來因賤體委頓息影內城僧舍承老先生賜顧有失
摠迎且未得報謝殊抱歉仄太老先生雙壽勉成俚句
自媿拙劣尙容躬祝以展鄙忱做省試事正未有期前
說當姑止之便中并及不盡晚朗頓首

接教極荷留神謝謝朗少困賤更因工握算况清江權
稅爲數五萬有奇項款無多易於料理心計之餘正堪

追陪嘯咏幸先生鼎力吹噓感戢無旣草復德翁老先
生晚弟朗頓首

連日賤冗不獲趨領大教殊深歉仄近工部咨過貴衙
門監生慕國璿係做鄉藩臺慕公乃郎托沈繹堂老師
爲之照管日來未見轉咨送監屬晚轉懇老先生得卽
咨送深感照拂未審日內能卽移文否晚本圖面叩緣
內城有事不能如願特此布瀆希台原之冗次草率不
盡晚朗頓首
蔡太守兆豐

別後走澄江與賡明竭力方得達尊札於當事不意竟成畫餅卽不佞亦有所求仍未見允束手而還垂頭喪氣作客之難如此目下解維北去囊中止餘十金故分家累之半回南望門下少資助一臂不過數金已足再乞示知何如不佞擬孟夏中旬至白下邀門下一面并有所求方能返都但不知簡年兄會考否有王誠者二峯周夫子薦於不佞在關一年亦無甚提挈茲以不佞差滿特轉送門下端懇酌用容面晤另布何如是瀆介子抵淮知門下已從中路到任矣此中况味不佞領

畧已盡但門下才福過人自與不佞蹇劣者不可同日語矣會試得人不佞竟不知姓名爲誰幸一一遣一的役送過蕪關俾其無阻則仰仍高誼豈啻百朋哉小詩已刻就謹呈覽至毘陵時賡明已代不佞災木故阮亭之敘門下之跋俱未壽梓入都時卽應借光也餘不一白下返棹復寥落於吳門謙老之札又辜高誼所以項客之金竟負門下而北至今中心猶駑駘不安也入都應酬一切不能少而索逋者盈門銅觔參罰叠見必不能依限完公停陞待罪竟成廢錮將來不知何以結此

局也去歲長家兄渡江時多承雲誼并及小力開罪門
下之處諸凡皆不佞過也竊台駕抵都時當泥首以謝
不遑耳關上風景何如知門下才福兼至之人自必有
佳况也鄧元昭夫子乞念及淵源時時照拂不佞廿年
索莫負知己者不可名狀方將無以自立於天地間門
下肯代不佞稍進教焉與有感佩矣仲調年兄此際想
聚首何樂如之廣明會一過從否此君好義而貧淵明
瓶粟不致相累乎此今瓜期已及計晤對時或在初秋
南方溽暑萬祈珍攝來教領悉容謝不一

張明府錫懌

二十餘年道義骨肉之情遙望音微如在天上昨晤魯
公知文旌適臨敝郡把臂在邇喜不能寐緣敝居淺隘
蓬蒿之徑不足容高賢之駕有艾舍甥居稍覺軒爽已
令懸榻以俟正擬遣价奉迓先辱手教極荷注存尚此
布謝即日面傾積悃諸不及贅臨楮翹切小兒囑候老
世臺先生賤名單具

春初舍親王克成入都會以一行奉候想達記室矣每
詢南歸人知門下近履安和聲望日著朝野俱傾注公

輔之擢故人雖卧滄江分東壁之光欣慰又何如也茲
因舍姪澤復應試之便復此附候舍姪爲先叔學憲子
美公冢孫敝同門繹翁先生玉潤才品頗佳想高軒在
敝郡時曾已識韓茲來晉謁祈門下青盼對之曲爲揄
揚卽感推愛餘非有所干請也另有裏言托賓門舍姪
轉達幸垂照不盡

別來數載知己骨肉之念時切於心而南北阻修未由
把晤昔在稜陵崙使叩候荷蒙雅愛惓惓不勝感佩足
下膺特達之知處郎官之重盈門桃李聲望日隆不肖

叨在故交與有榮施矣兩年來爲老父抱疴日事湯藥
今已幸就痊可止以親老家貧連遭荒歉不免北門之
歎倘有出仕敝地者祈足下留神專囑夏初偶過禾中
秀令李君相待甚薄又以公正發憤爲舊令屠伯所辱
况味尤屬不堪此人革任而鞭棍橫及多人飛詐遍乎
闔邑奇貪異酷述之大堪髮指同邑秦兄僕筆硯交也
其人英爽真摯大可結納特有裏言囑之奉商幸足下
進而教之救民塗炭爲我輩種德事不止一邑造福耳
餘情種種非筆墨可盡如有便羽希惠好音

已亥之春與門下握別城隅屈指已九易裘葛矣每念雅誼感不去心六益兄歸具悉近况知更肆力於詩古文詞喜慰特甚嗣從舍弟處得接手訊聞捷秋闈踴躍可知更望來春大魁高輟爲故人光寵也賢橋梓叔姪孝友風雅瑞鍾一門而不佞得以一日之知叨附孔李之契暮雲春樹百倍恆情未審快對當在何時也不佞罪放以來南畝半荒困阨已極所幸高堂無恙稚子在庭而登臨詩酒之興尙復不淺但苦塵冗紛然不能力學著書成一家言以副知己之望異時相敘譚衷滋深抱

愧耳偶刻二種附呈粲政恐中有忌諱切勿示人也同人中如謝兄賓馬兄理李兄憲程兄佩呂兄律不及另啓俱望一一道念使知故人好在足矣旅次偶逢舍弟入都草草附候諸未盡悉生錫懌頓首前勞尊使至舍慢去爲歉日來時望台旌賁臨懸榻以俟者久矣想因尊冗未卽惠然耶不肖時欲赴郡一候行臺而俗冗糾紛刻下又以掃墓往鄉未能如願望前二日家兄壽誕鼓棹茸城奉迎台從過舍也先此布候臨楮神馳

憶自亥春把晤叨擾德門承足下情文倍摯曲盡款接之禮握別依依十年來如一日也嗣聞賢書高輟隨捷禮闈又以聖天子臨雍盛典超擢儀曹粉署含香盈門桃李在足下可謂極遭際之隆雖故人搖落與有榮施可勝欣慰別來連得手訊深荷不遺近知駐節秣陵去倣鄉止數百里而遙每欲鼓棹一候而以家君年屆古稀適抱危疾周旋湯藥者四月有餘難以痊可此心耿耿未遑如願特此先勒數行奉候足下回京之期當在何時幸惠德音以慰懸注戊榜貴門下諸兄乞示姓氏

一單晤間希爲齒及以見水木之雅尤佩高誼鼎爵董書二種出自鄙悃不敢具套并祈鑒入臨楮不盡瞻溯

金明府煜

燕越阻脩良晤維艱馳慕之私想同之也丑之冬舍妹丈自京門旋歸荷兄翁所致一函具稔至誼不意所事不果可勝惆悵前函尙存俟另日乘便繳記室耳啓者倣鄉平子遠先生越中名宿天下全才也都門縉紳碩輔靡不重爲斗山其文章歌詩氣誼經濟度邁倫伍實有不可一世之概以故聲望滿長安交遊徧宇內且與

不佞素稱莫逆風雨同心晨夕晤言非一日矣茲者訪友金臺企兄翁之雅進而樞覲凡有可以爲子遠先生地者所不吝多方揚美曲爲玉成心銘臆誌豈僅子老一人已哉顧在兄翁慎勿以不佞爲曹邱之請也亦日以素所相契者達之足下以天下所共推交重者聞之足下知兄翁定當心鑒也太翁暨秩宗令兄希爲叱致不及另柬臨風瞻溯餘悰縷縷願言不宣

別后倏彌月矣盈盈一水不啻相隔萬重跂懷日夕在抱貴銀鹿至脩詢年兄近履康勝曾有茗上之行目今

尙在鴛湖渴欲一到嘉禾以看烟雨偕足下再爲談心奈緣俗務所糾未獲如願悵也何如蒙云稅契一事已經印出荷年兄志學之數臆誌心銘至帖雖一次更正皆雅誼所致而未能常若如此亦惟有付之度外而已不佞數載家食仰屋興嗟從未以窘狀相對諒年兄必知之悉倘便中郵寄衡齋王父母函內希加意道及不佞蕭蕭近况每事注眷卽如躬賴垂照也明春意欲前赴京門有懷欲吐想定勿我遐棄耳臨風瞻溯不盡所云

戴府丞京會

青門惠餞感昆玉雅誼不置反里少圖養痾不意卽有鄰警飲食夢魂總無甯晷而貧落更不待言時念都門周旋尙不寥索見邸抄知借金天官清通簡要斯地與斯人正相當喜甚喜甚令兄又留玉堂直令人羨健而故交如僕懽慰更異尋常也武定張容菴入都之便草勒附候容菴氣誼過人才情亦超軼貴鄉待罪時甲午拔士也其臭味當與門下有針芥之投幸垂手接引之諸張公能口述不具悉令兄同此致候不另柬

劉中丞芳躅

年來潦倒無聊資生乏策往來燕山易水間自顧可慚亦可笑也計拙無衣食途窮仗友生殆今日咏乎頃在奇峰學舍挂藜刈麥接得從子手稟應考職之試總之此時壅滯難以得官不如得少優於頂帶者爲榮身計之爲當也從子爲先伯兄第三兒自幼在僕左右敢邀世好代爲禱祈幸吹屋烏列於州同爲望文雖久疎字亦尙堪作養也僕於望後亦擬策蹇來京補夏至祀墓之禮當面雅誼曩屢拜注存皆以陳廢步未出門頗多

失咎疎節之罪定荷知己亮之附及未一

僕抱病連年展轉山舍不返里門者兩閱歲矣曩聞尊先人乘箕而去凡仰芳型者罔不雪涕矧僕親炙輝光者乎唯是不能力趨執紼特從同人後一申雞絮至今歉仄耳惟門下以禮自持爲國珍玉良用遠慰使旋附候孝思啓事匪遙諸容面悉

道兄居白下之勝區賦黃初之麗製驚人之句定滿篋中矣不孝自遭大故萬緒荒迷於六月初旬草草扶喪北返中元前二日已達潞河值葆酌弟南還話別津次

念其襍被阮途深切懸注特以菽水事遠瀆知己幸道兄推愛格外潤之俾邀仁人之粟以歸奉高堂卽不孝數千里外藉慰孔懷雖在聖廬中不異身佩渥賜已臨

楮禱切

張都轉應瑞

曩者帆檣失濟幾沒廣陵之濤雖貽戚自人乎亦數奇偶相值耳廢棄以來邱壑是甘綠野午橋固未敢希蹤昔賢萬一然而時命自遣頗達盈虛每臨風一嘯覺怨尤都捐而身世枯榮猶未能累我方寸也門下當衰經

傷心之際乃承不忘夙昔疊相注慰加以蒞勵厥情渥
矣惟是驚弓之翮無意高飛又况時勢殊昔更非蹇足
頓蹄思起之日正未知豐草茂林何時釋我尙能再礪
鉛刀以副知己之望否邊陲未靖中外需賢統冀順時
節哀善徯寢興爲蒼生自愛所謂移孝作忠者生且拭目
望之矣因鴻佈復心與楮遙令兄年翁不及另函希
致意爲感名具單

張提學鴻猷

睽違道範轉盼三年每憶芝宇惟仰看屋梁月耳邇者

春光滿眼景物增輝老年臺福履與時並茂榮補在卽
會晤想亦不遙弟向日校士恐致迷目之誚今雖量移
大有蚊負之懼何當遠念敬謝敬謝承諭事弟卽特懇
家孟已慨允留神勿煩清慮謹此奉復兼候新社臨池
依依

曹太守首望

不晤道範夢寤爲勞老年臺典禮南宮思皇多士以視
弟之伴食河濱者真雲泥隔矣茲有敝業師諱朱清豐
者豐庠寒士也半生螢雪甫就廣文一席萬懇老年臺

拔之前予庶幾河清可俟也卽達之堂翁無不可者伏
候崇禧臨穎馳溯

謝御史兆昌

憶夏間分袂裘葛倏更瞻企之私與日俱積老年翁剔
釐多方商民咸戴因知大經濟人事業迥越尋常萬萬
也欣慰欣慰弟碌碌寡緣素殫自媿不敢擅附魚函有
溷清思惟抱疎濶之譽而已茲啓家表兄孝廉范諱克
初者近以就塾宛城匆匆南下與弟卅角問業同體關
情幸其道由駐節敬修尺素令謁崇堦祈老年翁推國

士之愛弗靳春風而和煦之銘佩不特家表兄已耳臨
楮倦切不盡依依

高觀察恆豫

久睽芝範企慕良深第俗緒勞勞弗獲趨聆塵誨殊爲
悵惘耳承諭自當仰遵奈昨已定議不能復更非敢故
方台命也草此奉復幸惟鑒原不一

王尙書日藻

星迴律轉歲序將更東閣一枝早逗陽和景色想老年
世臺經術旁昭於啓事詩才仰繼乎臨沂履泰運以宣

猷對芳辰而屬句景禧滋至孚契彌深企羨之私奚可
言喻秋初辱賜瑤函并貽瓊玖屬以順郵裁報未罄縷
忱茲草蕪律四十韻藉用椒觴北望五雲濡毫莫罄

桑參議開運

老年臺瑚璉重器望高山斗遙想仁風悠悠我思自憶
都門聚首常聆塵誨霏霏玉屑迄今猶在耳伴間也春
序融韶老年臺福祉駢臻無容遠卜弟迂拙散材濫竽
珂里正愧螳臂當車所幸指南有藉辱承腆貺俾弟益
增惶悚而老年臺千里隆情不敢堅卻謹登錦卮餘儀

就伴附璧一切雲誼嗣容面謝匆匆草復臨池曷勝悚

仄之至

于進士璉

日望老長官早到爲衙門主持且侍得藉以息肩歸省
不如別項告假之屬託詞也昨見暫以恙請之疏殊失
鄙意仍祈速出東山侍當作湖海散人以慶榮遷耳雅
望原自出羣而諸堂臺揄揚更切足稱兩得已將台意
致之矣大年兄執照未到他人俱駁以老長官故止以
再議了案其繳之遲速無定限卽遣人與親身皆可也

各長官俱道台意并復不一覆稿呈上侍名另具

張太傅英

日來未得奉晤小兒卷聞已在部中幸年兄入署時查示萬萬弟英頓首

地輿圖為芳傳家兄持去竟不見還奈何無以奉覽幸亮之弟英頓首

孫處士焯

老年臺以聖系而膺帝眷久為當代所景仰小兒在豐得托門墻永締世誼誠三生之有幸也弟時擬鼓金陵

之棹親承芝字以慰鄙懷奈去夏竭蹶于報費秋卽有遣兒婦往北之役三冬飛雪積旬今又緣文衡在敝郡坐是有懷輒阻而中心之神馳無已茲者令叔老先生賁臨捧讀瑤函恍如提命但弟僻居鄉曲不能常隨侍令叔老先生之側至所委又不得當負疚益深台旌指日北上小兒在署伏望多方栽植不啻再造之恩也荒函率復不盡縷縷

燕臺別後數載企思幸遇台旌南指小兒獲聆教言且悉福履萬安忻慰忻慰夏初暨詣會城忽患河魚之疾

卽鼓歸權聞尊駕將至敝郡凖擬望風晉謁一罄積忱
前讀翰誨諄諄感同骨肉知蒙賜顧昭慶若行尙待稍
涼弟又爲暑雨經旬蒿目巨浸未及至省稽此良晤衰
年種種疎懶罪歉殊深茲值小兒趨侍左右率此奉復
惟冀老師臺先生以時珍攝爲國自重遙情縷縷臨穎
瞻溯

王學士尹方

夏斗巖至都得悉老年伯近履後接台教如覲紫芝欣
忭欣忭前所委事姪明知難行故欲假手觀玉以圖得

當不意渠漫不經意至臨時始將原札發出致彼此兩
誤至今舍弟輩尙不敢與此童覲面皆觀老之過也原
札去歲臨行時不知收歸何處今於書笥中翻尋數次
絕不可得俟檢出時寄去何如姪自浙省回後終日病
鄉氣息慙慙漸無生理而他省之主試者反揚眉吐氣
奮發精神此事殊屬不解意者文運漸衰黃金勢盛白
雪無光妍之所爲亦自取逆天之咎耶今已貧病交作
勉強支持正不識究竟何似耳因便附候再呈拙刻三
種新稿一部統希教定諸祈慈諒臨啓曷勝依切

劉郎中始恢

冬仲拜別倏易葛裘時序易遷懷思彌切都門聚首三月極荷老先生世臺骨肉之愛古道古心至情至誼每一念及感勤久之當波靡之中有此大賢真中流砥柱侍實爲之心折非敢諛也先叔謬叨一日之知承老先生世臺諄諄念及真令人感人肺腑侍於展墓時默陳古誼想先叔亦啣結於九原也侍閉戶守拙一切聞見甚短凡有可相關者務望留意家兄就試中翰現寓都門倘有大札卽轉付郵寄可耳做地如有新任公祖出

都統祈齒芬俾家居不致岑寂其感佩曷有既耶大世翁不及另啓統此致候餘衷縷縷不盡侍名正勒

張少保鵬翮

入春以來兩讀手教深荷垂注計事得邀照煥感不去懷東郡一章出自公心惜乎爲例所格乃老年兄亦加扼腕緇衣之好實有同心矣復聖門坊傾圮弟既居此邦自當力任其事不待諄囑至書院顛末藩司覲旋之日已聞大畧今台諭復及之容令司道郡邑熟籌以報也辱在契厚諸凡幸爲留意不吝指南是所禱切澁源

倡和詩小清河議二刻奉塵清覽老年兄爲海內宗工
乃自忘其陋舞斧於大匠之門真不滿一喙也弟名箋
具
客夏重承教愛瀕行復荷寵餞飽德銘心曷有紀極履
任來簿書鞅掌心勞政拙久稽謝悃時切悚惶承諭貴
鄉所行事宜翩雖賦質駑鈍敢不竭蹶遵奉幸藉餘波
東魯時和年豐民生樂業貴桑梓亦無不拜老先生之
賜矣去秋得瞻復聖廟貌益切景行仰止之思近閱邸
抄知有榮遷之喜由此端揆節鉞指日以竢殊爲欣忻

專力肅賀崇禱不腆侑函伏惟鑒茹臨啓馳溯

吳尙書一蜚

都門叩別復屆登龍令節矣斗山在望無任神馳做治
係塞外彈丸荒涼萬狀且又當往來要衝迎送之勞供
應之苦不可言喻近復調入內簾襍費不貲將來考成
之事殊切憂心外吏艱窘之狀有不堪爲知己道者承
老年兄厚情未遑圖報令人愧赧無地耳聞中分閱易
經與沁源馬邑兩公同事其中倘有簡默不到處萬望
老年兄曲爲照拂感佩高厚靡有已也草勒荒緘恭候

興居統祈原宥臨穎翹切

夏處士州梁

漂泊西南天地已越冬春調饑顏色返覺仙源是故鄉
矣今東君北上弟亦東歸前肅械兩次奉候曾達記室
否公郎學業想已大進豚兒在京屢沐青照感懷何已
歲月飄沉關河濶絕瞻晤不審在何時也聊寄土物二
色萬里鷺毛薄將遠懷伏惟叱茹拙稿數篇呈教臨池
曷任依注

于參議覺世

老伯大事未能執紼臨壙以伸猶子之誼五中愆然迄
今未已有自貴縣來者爭傳年兄哀毀之中祭葬一一
如禮以此知年兄孝思固度越倫等而經緯榦濟更自
非常也弟久病之後懷想教愛夢寐維勞捧誦翰教如
久別故人思獲快晤不覺霍然當茲溽暑炎歊惟冀年
兄節哀自玉恢鴻大業以顯前人則又孝之大者矣來
管遄發強病率復不盡百一

魯通政超

輶軒前賁雲間得以晨夕侍聆教益奚啻黃叔度消人

鄙吝心也違晤雖無多日而瞻戀縈懷却似三秋之久
何合人之思慕一至於此武林佳麗之地得老先生大
人行旌至止品題歌詠湖山草木倍開生面矣遙望紫
雲殊深洞溯頃接尊諭捧讀之下仰見高雲周詳篤摯
感佩何極當備勒心版也大駕臨松在卽接膝非遙統
俟面罄先此謝復臨池翹切

祖府尹允圖

臘底一別彈指春深迥望璇霄彌隔塵埃弟待罪珂鄉
繁劇萬狀前承瑤函遠及未遑修候起居歉仄殊甚老

年臺先生領袖人倫澄敘羣品遙瞻紫氣已映台躔矣
茲有啓者曹邑監生趙從大父子濟惡賊款纍纍撫軍
震怒必欲訪拿以除一方之蠹今伊子趙嶠潛入京都
未審作何勾當忝叨肺腑之誼率此奉聞幸爲留神敬
候回示匆匆不莊統希鑒宥不宣

王君詔

侯考

客歲握別至充隨謁太翁溫恭閒雅冠冕東國方知老
年翁本源有所自來奈緣行間碌碌不獲時親笑語後
又奉命移荆并老年翁興居亦未遑候至今歉仄錢生

重蒙作養弟實銘刻但以後照拂望老年翁終始以之
也至弟一身從役百事邇迤兀坐江濱未知稅駕老年
翁鴻猷碩畫胸中定有成筭不識能一指示否春華燦
發淑氣迎人福祉諒多駢集德門草草泐候欲言未罄
張中書鏤

前者大駕賁臨獲領教益契濶之懷於茲稍慰極欲謀
一尊邀敘而台旌遄發未遑少盡地主歉何可言尙擬
再過做邑一罄積悃不意遊屐久羈日深翹企昨從家
孟處讀手札知仙舟已抵吳門渴欲趨候攜濁醪數杯

同醉生公石畔而歲前多冗未得如願悵快無似老先
生以命世偉人處得爲之地將來勲業正未可量不才
如弟淪落自甘優游終老所恃雲霄知己垂意剪拂公
祖田文宗父母大令俱乞不吝鼎言一爲諄托俾田公
念及寒暑追隨史公俯推烏屋草野鄙人榮施無旣皆
荷老先生噓植甯有涯涘哉荒械附候臨楮神馳
臧御史眉錫

都門侍教以來倏已三匝月矣過荷雲誼諄諄有逾同
懷鏤刻五內曷其有旣願候青鎖黃扉以慰鄙懷然屈

指亦指日間矣弟因狼狽出都自覓費之艱稽遲至於
閏五月到任一入魯境滿目荆榛百無一熟人民寥寥
絕無市集然困窮之教分所宜受猶幸者僻耳簡耳僻
則無兵馬之苦簡則少供應之累豈料初三到任卽有
皖兵移駐之文百孔千瘡左支右吾至於從前雜差之
弊凋殘之病筆不能道以千百僅存之子遺半爲差徭
所驅逐有鬼無人有土無屋竟不成邑言之於邑聞之
駭絕者老門臺愛我將何以教我乎鄭俠之圖豈足繪
其一二耶李管精明幹才不必言矣亦因困苦之狀日

日告退弟勉留之亦五日京兆耳適有便羽先此附候
入秋尙容差人走叩馮夫子一札千祈面致并道弟地
獄之苦狀生我成我或援而救之乎他若掣肘之處貽
累之事巧婦無米之炊功令苛求之類尤不敢述之左
右者回想丁未連驢之日今春聚首之時其可得乎惠
子知我幸起之枯鮒爲禱諸同人處不及遍啓千祈叱
名鱗鴻不遠荒函之罪統祈慈宥臨穎主臣晚弟眉錫
頓首

前者敬脩小札郵寄塵覽想老門臺新禧倍佳指日梧

垣竹埤使風塵下吏得荷栽培感何可言都門過荷雲
天銘刻無既不意菲樗如弟筮此瘠土幸簡僻庶可藏
拙詎知兵馬之旁午天災之暴厲荒疲之狀筆不能盡
尤有甚者向因安插之未當致軍民之多故張弛之際
寬猛之間有大費籌畫者老門臺愛我將何以教我乎
至於糊口無策冰署蕭然此吾輩分內事不敢訴之知
已者前有一札呈馮夫子想已致之梁夫子處亦祈緩
頰但兩月內大兵迭至不擾一民大雨滂沱虔禱卽霽
流移之民歸者日多屯營之悍危者復安弟之告無罪

早

於知己以告無罪於 朝廷者此耳至於多方提攜尤
恃二天之在望耳便羽附侯臨穎主臣李使榦才惜窮
邑困頓屬稟候萬安同人前乞叱名郵報上乞示一札
至禱小弟名另肅

獲附驥尾已快平生乃復蒙雲誼殷殷真如就日飲醇
不知其煖弟匆匆策蹇歸里遂違笑言每憶芝眉疑在
天表不識比來道履何似想年兄讀書中秘化日舒長
樂可知也弟自返里中一味杜門不知戶外何事但奉
七旬老母日夕盡膝下之歡卽蔬食菜羹自覺甘美不

厭弟未審稅駕何日出宰何年脩職業以報知己未免
搖搖耳肅此附候愧乏有緘伏望鑒原臨穎悚仄紀年
兄不及奉柬祈叱致弟名單肅

施方伯天裔

接發初六八日兩次台函具見真切婉轉之至感激感
激令兄价回贖到尊札即當如教祇遵而行一氣之說
洵為直截諸惟老親臺張主酌定為之弟自是竭蹶勉
圖以應前所言銅原是無多皆數在各商陸續於臨關
賣去今顏親翁須銅必須另行覓購但地方缺乏銅觔

浙藩袁輔老差人東來採買臨清關又以缺銅徧覓一
時銅價騰踊且買銅托人甚為難之銀入其手即為已
物弟十分拮据追呼尙餘千金未清之價茲為老親臺
許顏親翁踐信之故弟當力任採買之事此處多方覓
購亦得八分五厘一觔或可覓三萬觔之數即賠償數
百金以報台命仰承老親臺踐宿諾之意也其銀留用
諸惟知己心照可耳臨穎可勝翹企之至不盡不盡弟
天裔頓首

任明府楓

曩承雅誼銘感之忱與濶別俱長茲復承注問天上仙
班猶念泥塗中有故人此德此情具有心胸能不耿耿
耶奈弟時命不猶墜落衢途百苦俱集真如坐地獄中
受諸惡趣將來但求生還故里便是厚幸敢復作功名
想哉以此負年臺提攜之意誠足浩歎耳其襟肘之狀
筆不能悉遺使當一口之也敬托八行藉手起居薄
儀伴函仰祈莞恕倘天念苦人不卽淪沒尙容圖報於
異日也年伯壽啓聊抒猶子華祝之誠然自媿布鼓矣
區區之衷惟冀鑒原不盡

李侍郎迴

都門數年共晨夕脩荷提誨顧良晤無幾年兄遽歸讀
禮聚首之感時塵寤寐客冬老年伯卜葬之吉不獲與
聞旣未能遠將雞絮躬莫靈右又不遑遣子姪輩代効
執紼猶子之誼闕然能勿歉仄滋深耶乃年兄旣不過
督更辱垂注感慚交集竊憶服闋在邇惟台旌早發以
慰蒼生霖雨之望翹切翹切謹此布復臨楮依依不盡
郭給諫昌

自違台範已屆深秋洞湖之私與日俱積弟以匪才謬

典晉闈公慎之懷天日可矢但入闈未及一旬而監臨以大兵卽至欲親自料理敦趣放榜至於再四弟以軍機所係不獲已於十八日竣事其爲匆遽實從前所未有兼之山右人材劣於他省時日旣迫僅取充額至若諸當事交際之間况味索莫更甚於往時凡此諒皆在老年臺洞鑒中者今諸卷俱已至大部校閱之時皆式遵功令其間字句或有未安此係謄錄之誤皆已細細抹出惟懇老年臺特爲照拂并祈鼎致同事諸公稍爲寬假俾弟得免衡鑒不精之戾皆出老年臺之鴻造矣

專函奉懇更托沈余兩做年伯轉致鄙私惟冀崇照臨楮可勝主臣
方中丞大猷

展叩瑤階老年台握手道故青眼相視優渥極矣弟囊空如洗沿門持鉢竟無定寓暇當過訪不敢勞尊駕也張公處昨許賜鼎函伏祈留神最汗顏者弟旋里不得欲求老年台轉貸三五金未審肯作此瑣事否也恃愛唐突自顧內慚惟老年台古道自處想不鄙此舊交也旅中文房未便草草宥諒制年弟大猷頓首

張參議永茂

習習新涼秋衣殊爽彷彿披塵訓於清襟前也欣接翰
言深慰饑渴然永茂謬承糧儲實切蚊負之懼惟藉知
愛如老年臺先生奚啻芘之以幬而滋之以露乎辱荷
雅貺另容圖報餘教書紳臨風可勝心醉此復銜名另
肅

鄭提學僑生

握別來經年積緒咫尺未通實深悵歎年兄福履諒在
佳暢弟叨職已期一無善政加民何當優譽之過及也

令親孔年翁過署緣荒邑窮員不能厚有所及何以謝
命茲順羽便還率附荒函祇候清居伏惟崇照不宣
許給諫承宣

幸託淵源方以獲承音旨慰十餘年渴饑不意復爾遐
阻徒令我厯東山之望也遽使至得拜手函稍慰翹切
老師叔騷壇宿望當此鍵戶讀禮時正可放懷嘯咏想
琬琰盈笥以之應 聖天子風雅之選自有神契可不
蔡而知也晚目下有纂修之役欲得尊府陋巷志以資
考證已於夫子稟函中致懇并希注神速惠臨穎不盡

依依

王尚書隲

計與老年翁違離十數餘載矣其間吾鄉之卓越飛騰者多有而文章聲望則君家兄弟真不可當弟里居遙存佩服切至時以隔遠疎候爲歉入都又復相左季春賫表時得聞起居於桐江處回閱邸報見老年翁旣補而旋陞不勝雀躍弟揮出荒蜀命軍前拮据年餘備極勞悴所事粗就比之古人不敢當較之今人無多讓也然所費者稱貸之錢所辦者耘田之事一番勤苦卒同

逝風豈非拙者之效乎山川險阻隔在異域恨不能向知已一傾吐也茲借胡貞巖先生入覲的便肅此敬候台履新禧萬安附呈詠懷十二韻雖不成詩然亦燃鬚數斷而得也幸勿以短歌擯之爲感臨穎馳依弗旣

徐中丞相國

別來又幾一載矣每憶知已握乎談心時不可多得也春初入省雖不能留益地方然硜硜守拙無愧乃心差足自安耳適接翰教知老親翁秋初發駕深以爲喜情多關切不待諄諄口吻間也佳惠遠頒不敢固辭謹登

款爵用誌高雅一芹伴函殊慚藪草裁附復并候近
禧臨楮可勝瞻湖弟名另具大老師在安順想萬福萬
安弟於五月間晤丁制臺已諄囑之矣并此附聞又拜
魏觀察學渠

酉冬都門言別辱老年臺雅誼稠疊感勒心腑嗣聞校
士南宮而得人爲盛司筦江左而惠政遙傳徒以音驛
疎濶未獲申賀爲歉耳頃白年翁入楚得接瑤翰兼讀
闈書如侍色笑深荷垂念所云鄒子蚤已遵命矣若弟
與仲老原係同學宿契其令兄遠來值弟晃晃在疚兼

謝事已久雖黽勉周旋而于中尙抱耿也舟過金陵以
不祥姓名未敢入謁聊佈芹私并復前教統祈慈鑒臨
楮神馳歸舟并祈台庇制弟名崑肅

趙太守開雍

曩者承乏東魯年翁不鄙棄俗吏琬琰鴻章虛懷問字
追憶舊游依依如昨日事也彈指十載年翁翔步雲霄
蜚聲文苑不佞以衰病郡守予告歸田亦曾念及蘭譜
中尙有此老人乎頃訪舊石城去臺端咫尺特遣小力
泥首台階不腆之儀聊申積忱小刻積有十餘種皆零

星散去矣謹將存諸行笈者先呈教正江上布帆若未
卽發仍圖面布區區也開雍再頓首

衰頽病叟荷老年翁篤念故人不遠二十之遙高軒枉
顧古誼哉今人所未有也賤體纏綿又在逆旅觸事增
人懷抱刻下力疾登舟頭涔涔作痛不能躬詣臺端惟
老年翁原鑒所懇轉書俟當事按臨有期令胞弟開禧
親來面瀆也臨啓不盡開雍再頓首

朱處士綵

昨於句曲聊寄數行奉復想入台覽矣弟今已抵京口

晤涵老盤桓竟夜擬於望後次日長行此後晤期未卜
中心依依之私實晝夜不能去懷也年兄入都遲速吾
三人所見畧同綸兄已先作字田二年兄大約言年兄
自能念同鄉之雅而樂道甘貧在桐老亦自應有實際
之處弟之家函亦復爾爾想不日卽有回音斷乎不致
落空耳連日清恙當已全愈打鐘固不必言復有餘興
鑄銅石并望示知山東試錄涵老處亦未曾到統此布
聞不盡馳依

地間咫尺渺如天際每憶曩春趨叩台堦時蒙兩年兄

過愛飲食教誨之德迄今宛然在意念間也茲接手翰
捧讀恍晤有道丰範兼荷垂注殷殷五中感勒曷有涯
哉時序迭更倏已節屆履霜兩年翁先生孝思興感無
已幸惟抑情自玉以慰鄙懷拳結羽便肅候近履統希
丙鑒不盡馳切

朱學博紱

寒門不幸忽罹先伯父變故過蒙雲天高義沒存并爲
銜結弟乞假歸里日經營喪葬未遑脩尺一伸候孝履
正深歉仄忽接手翰慰藉慙慙雅愛隆情益深銘勒別

諭已悉家兄函中不敢多贅羽便率復并候近祉臨楮
翹切不旣依依

沈修撰廷文

去冬傳年兄歸里接手翰深荷垂注感何可言年長兄
晉陟清晏雍容翔步入座可期而且琴瑟克諧賞心悅
目大福澤人固宜有此耳偃蹇如弟家居困頓不知何
日得補一官與吾兄弟歡然道故也室中吼聲稍息附
聞以當一笑茲以小倅探親入都代叩大年兄年兄闔
府萬福傲縣新父母王公諱天壽者爲旗下筆帖式不

久到任敢乞台駕親往一晤鼎呂道意或開一單云候
補某名更感茲接官衙役數人忠厚守法或可便中一
言特令叩首台端並酌之臨筆依依不盡事例全停否
卽用先用確數乞一一示下祝祝
許員外聖朝

別來八閱月傾慕無時去念前於清和得拜德音骨肉
之語溢於墨楮弟感媿交集矣夏仲聞新旨有中翰之
選卽爲吾兄屬望者久之及覽邸抄已知巍然高列歡
喜欲狂綸扉要地以俊才居之深爲 朝廷得人慶不

特吾兄弟分輝已也謏劣如弟昂首何時惟望年兄錫
之教言砭我屯蒙并惠佳篇以爲楷式幸甚矣年伯年
伯母納福可知會迎養都門否年嫂在京柳在家耶乞
一一示之爲慰今以家兄人都敬候新禧諸凡更懇指
南維持足似至愛茲具不腆少伸賀私萬惟叱存扇頭
俚句可供一噓並希削正臨穎馳戀不盡欲吐吾鄉年
友及別省諸公硃卷并惠數冊望望新詩賜一讀更感
弟名另具

去歲夏間大年兄道經敝郡曾剪燈爲竟夜之談一洗

兩載渴塵也瀕行附數字候年兄起居自久入掌記矣
今閱邸抄知大兄榮補邇聞台駕有江南之遊想亦當
早晚入春明也偃蹇如弟無足比數滿望年兄爲一疏
通之法便造福無窮耳茲宗姪許祺慕關里之勝兼訪
沈漢老此子繪事頗工如年兄處有燈屏等類可命効
勞非尋常畫士營營逐逐者比羽便專候近祉憑穎馳
切之至

數年契濶梁月之思時勞夢寐向知年兄久遊江左桃
葉賞心令人健羨但不識河東先生見之猶憐否榮補

入署清通望重從此雍容翔步晉陟崇階在指顧間耳
弟困頓無賴家居數載苦無佳况不審何時得入長安
共知己快聚也乞留神查示弟上邊共有幾人目前無
別項事例源源而來者乎南遊吟咏必多佳刻幸賜教
茲以傅年兄北上敬候近祉無緣言面臨穎但有神馳
大年兄道意容再報

咫尺龍門心密形疎誠恐年臺事冗未敢時煩起居弟
以冗坐衙齋又不便常爲出入耳忽聞報命在邇不禁
悚然榮行定於何日如有暇晷弟當馳走階前一別以

見數千里外故人相遇存此戀戀之私可也專伴敬請
幸惠好音前紙求書賜下弟名另具

顧處士雲臣

謬承老先生台愛委寫待漏調琴圖二幅塗鴉之伎殊
不堪入大方之目歲朝復蒙隆重諄諄話別敢不以病
軀力疾勉握管城祇以撫軍命晚雲寫照方苦辭咎不
能故爾稍爲延緩今如命附呈惟祈臺宥不工之罪隆
貺遠頒謝非筆罄不識旆帆北發可能再渡吳門使鄧
尉梅花生色倘可噓植處萬望老先生多方留意令親

社翁統惟叱致臨楮曷任翹切

李處士漁

昆季聯翩而起又同仕廟堂不分內外者自崑山三太
史而外指不數屈澹圖修來兩先生其匹休者也野老
入都聞此等盛事不可無一語紀之謹撰一聯以疥尊
壁未審有當否也前以賀書鄙事奉托想荷留神行期
日迫一日幸早圖之附聞不一

前以賀書瑣事瀆聞想爲留意茲行期已屆乞示德音
卽購者寥寥亦求自用一二十部輕我行裝爲惠多矣

立候回示不盡晚弟李漁頓首修翁老年臺大人
來單一紙卽求專役代傳其求售之故及價值多寡悉
在其中可省一番揮翰之勞但擇可與言者幾何人悉
發尊刺煩貴役面索所用書單則此事半日可了至查
各書分送亦易爲力多去一部少受一部之累早去一
日少擔一日之憂皆知已之賜也貴役自當勞之卽日
遣行是禱

漁行裝已束刻日南歸所餘拙刻尙多道路難行不能
攜載請以質之同人或自閱或贈人無所不可價較書

肆更廉不論每部幾何但以本計每本只取紋價五分
有套者每套又加壹錢南方書本最厚較之坊間所售
者一本可抵二、三本卽裝釘之材料工拙亦絕不相同
也不用則已用則別示一單以便分送書到之時卽授
以值不悞行期至感至感漁具

王中書士驥

公集以後匆匆旋里造謝不及負咎良多弟於時意欲
南行以爲白下仍可相晤不謂資斧不給終於不果憶
老年門臺簫鼓樓船峭帆金焦之下壯遊高咏正堪羨

耳茲家兄士表代候近祉特懇推愛教之俾其行李得
達粵東則愚兄弟均戴高雅矣臨楮南望不盡欲言

顧芳菁

侯考

弟被放南歸未遑趨賀左右客冬因坊人有拙選源雅
之約更承做郡宋既老蔡九老章鶴老諸同人見托祈
老年翁卽惠瑤章以便彙選臨楮無任翹切瑤章乞寄
西河沿豹變齋書坊名單具

成侍衛德

成德謹稟太夫子臺下前接手諭因悉起居住勝翹首

南天益增悵望悠悠夢想願飛無翼種種并志之矣使
旋布候不宣成德頓首

史詹事夔

日來館課碌碌未獲聆教爲歉茲啓家表叔陳諱宗石
向曾以領誥命事奉懇適有彼處衙役明日回縣老年
伯如已爲彼領出乞卽發下幸甚幸甚餘容面謝不一
顏老年伯大人年姪史夔頓首

捧讀老年伯大篇理熟程朱學兼左史起大雅於近今
振絕響於初古正希陶菴差足比肩餘不足道也抄本

五篇完上幸檢入家叔嚮慕已久渴欲請教兩日內卽
擬造謁闈墨當自攜到也呵凍草復顏老年伯大人年
姪史夔頓首

楊處士丕顯

別後歸來又造一在字橐籥并華山仙方之原文并錄
乃丹房法器甯可備不用而不可備果識水沉金
浮實爲延年一助再備之濟人乃是補虛癆瘵之第一
件事可不知乎今日秋分金水平平人氣在下人神在
腎正當靜坐調我真呼吸識得外呼內吸出實所以入

入則實所以出古云君休輕此一聲呼八脈週流似輓
轡次第地中雷隱隱遍施甘雨潤屠蘇正在此中靜默
又不知台駕榮旋還到真州否耶再得白水豆腐說方
外餘言以作快談早示一信恐其他往以便候教近聞
糧憲陸道臺風波台臺早已一口道破真大儒之明理
明道之識見成先覺者台臺也我惟爲陸公好人真可
惜也不知連日有甚新聞耶陸公尙可保全耶若有真
信示我以聞何如再台駕南回實何日可定耶外慨許
閩台前囑之更望留神是荷犬兒不敢另稟神馳不盡

楊丕顯頓首

余處士國楨

耳芳名者久矣徒懷山斗之仰莫遂識韓之願昨得傾
蓋龍門相見恨晚乃蒙老年臺雅愛有加溝中之獸有
汚顏色矣復承寵召誼何敢辭以歲聿云暮卽擬北渡
然隆情至意已心版鏤之矣謝謝江浦徐年翁係舍弟
舊屬會附門墻昨冬舍弟北上時存一檄屬弟往謁以
家兄之故恐不敢徑晤懇老年臺俯賜一札先於所往
弟卽日北行郇伯膏雨可資阮途幸惟慨然至家兄事

札內可不必及之東裝匆匆不及再候把臂聚晤當在
來歲夏仲燕臺復命時也臨穎可勝依戀

張給諫惟赤

蒲月舟次一晤別後曾幾何時忽又霜楓如醉矣昨從
張幼青舍親處得接手教深慰鄙懷銅斤爲權闕第一
義得如額便可報最矣門下玉笋聯班寅清望重興會
之饒自可想見不佞自歸田以後癖杜甚堅視戶外一
切絕不與聞然三徑雖幽而二豎時侵近狀不足爲知
已道也適因徐舍親之便率勒附言舍親名賡元者慕

六館之中英遊羣集有志觀光恂恂少年初入都門百
凡望推分照拂感不獨舍親也匆匆布勒不盡神跋

范處士

璋

滋陽縣范珮范璋謹稟切珮曾祖諱淑泰字木漸生於
壬寅年二月二十三日中丁卯科舉人戊辰進士初任
行人二任工科三任吏科四任兵科右五任吏科左給
事壬午年典試浙江又轉兵科都給事場中以暑勞太
過感患瘧疾迴途病甚十一月中旬到家即遭大變殉
難年僅四十一歲蒙總河黃具題准贈太僕司少卿蔭

一子入監讀書遺男三人長男名懷仁字子人係府庠
廩生年二十四歲於順治元年六月傷寒病卒次男培
仁字知人康熙元年出貢三十七歲病卒遺一男二女
男宗鎮十八歲夭折有負諸恩師培植二女將近成人
尙未出嫁季男宏仁年八歲甲申年被擄懷仁遺男景
麟父母俱亡祖母撫養順治十四年麟十七歲蒙恩師
丁諱澎莊諱遴二大人念昔先人扶持讀書爲滋陽縣
庠生不幸於康熙十二年三十三歲又卒遺孤珮璋二
人是木漸先曾祖一線血脈止珮璋兄弟珮今年十八

歲身中面白無鬚璋年十六歲身中面白微麻無鬚俱
業儒母孀子幼茕茕無倚謹詳陳具稟伏乞憐憫先曾
祖亦感恩地下矣

紀給諫愈

孫北海先生著書統借一閱爲望容謝未旣阮亭詩集
亦希惠觀弟愈頓首

敝省放榜日期舊例京兆具題今日曾見有疏否適未
之及也希示之弟愈頓首

又聞點奉倩年伯與朱穎老序次而行則年兄與穎老

爲是也當日車乃長班所僱 聖駕起行此項最多容
遣人覓之另報衙門阜隸儘可不用領馬等事俱不必
親往此復昨奉訪不遇午間再當趨晤外具薄分八星
南郊竟日之談足堪絕倒兼之名園滌水豁我煩襟迄
今清涼猶在望也趙椽收標効用之事有定議否希詳
示爲荷令兄年臺門牆殊卷賜教是感

梁進士聯馨

前承年兄體念知我之感耿耿銘心矣尙容踵謝也咨
監當在何日幸示弟知以便復彼耳切切小弟聯馨頓

首

李進士彥瑁

前所商者既蒙年兄諾發有緊要舍親此間尙餘瑣事未結不久亦將西歸幸年兄速就外面封固交付敝鄉梁峒樵年翁處萬無一差弟亦丈夫者流慎勿以區區小件作狐疑也臨行不及走別悵悵孤弟彥瑁稽顙

王司馬穀振

蔡夫子遷居吾輩當設一公席煖房張長來言云是夫子之意弟思此舉亦斷不可少昨已與謝門兄商之云

兼以祝壽實一舉兩便乞年門兄裁之不盡來翁年兄賜覽小弟王穀振頓首

郭明府昂

郭昂謹稟昂自卧病以來賤體虧損元氣尙未平復祇因家計單寒帶病出遊不意舟車又復勞頓痔瘡痛楚日夜呻吟氣息慙慙醫藥無效本擬初九日叩辭蒙老夫子注留殷殷不敢造次至初十日午後大便時忽然下血不啻碗餘昏卧榻上衣被盡赤浸淫半夜不止奇痛剜心莫知所措昂竊自惴恐非佳兆想本薄福之人

不應過叨知遇昂之命蹇何一至此乎因念離家之日
兒女棉絮不周妻子饘粥莫繼留於家者僅支半月充
行橐者未滿十金內外關心貧病交集於此時也卽欲
大度排遣有不可得者矣昂非不諒老夫子權使苦差
兼多賠費然而窮兒女有苦莫訴苟不向慈父母痛哭
陳之則將誰告耶在慈父母之心雖或憎其絮聒亦必
轉而憐念也倘得藉此調養病痛霍然而愈生我成我
圖報當必有日卽或不能邀天之幸終以貧病而廢陶
淵明所謂冥報以相貽亦自有不爽者昂今急欲返舍

旦夕必行若明日瘡痛稍止尤必勉叩階前以謝明德
否則忍痛登舟取便而返惟有稽首翹謝而已先此布
告臨行再爲上聞附有懇者昂有一弟繼嗣寒族家貧
不偶讀書未成聞老夫子處有贊禮劄付倘蒙見惠一
紙俾得了其終身是亦附於門墻之末也不盡欲言臨
楮翹切

郭昂謹稟老夫子台臺昂一介寒流蒙老夫子知遇之
恩千載一時餐花結草自矢生平而福命舛薄得此奇
窮極苦之缺去秋藉庇方得出都抵任以來士傲民頑

靡所措手額糧二萬有奇每歲逋欠十分之一存款全
裁一毫無可通融而又迫於功令不得不借墊起解公
私逋負如水益深兼之材短勢孤汨沒苦海中未知稅
駕也門墻之下久疎問候側聞特簡銓曹私心忻忭而
賀忱莫展轉貸逾時亦尙缺焉未報負罪如山靡敢卽
安乃蒙慈鑒遠辱手筆恕之教之高天厚地非尋常師
弟之誼所可方其萬一者昂惟有感泣而已孟邑僻在
深山不通孔道俟使則力所未能便鴻又不易有適崔
門人從此入都敬候函丈一楫燕詞稍見依戀之素至

於晉中上臺驛憲相待頗優外此不無危疑之慮有可
以爲昂地者乞老夫子留意焉種種積忱容俟深秋再
圖報稱伏冀鑒原昂臨稟可勝悚切之至

孫侍郎在豐

自春明拜送絳帳南行依戀之私旌旆同馳雖仰斗瞻
雲未足寫其勞積也恭惟老夫子榮任以來道履清勝
諸事多福慰藉慰藉在豐以散材而逢匠石斧琢所加
欲使成器在夫子聲名自遠出韓歐二公之上小子何
人亦同李翱蘇軾之遇其叨榮非分真異於尋常萬萬

矣寸草春揮何由報答惟是力行困學期於無負官墻而基薄墻高汲深綆短常恐不克負荷如何如何在豐於季夏之八日進館入則有受書問字之勞出則有賃春索米之苦獨居顧影形神俱瘁兼之函丈遙天指南無自茫茫塵海深以隕越爲憂必得老夫子錫以渠誨示之周行或不致迷罔無從耳伏冀俯念樗材無忘葑菲倘遇便鴻時賜郵寄天上嗣音不啻親承風旨矣秋高露白時家君尙容晉謁龍門頓謝生成大德以申御李之懷先於郵報中肅函稟候臨啓不勝翹依之至孫

在豐載頓首

奉違函丈自春徂秋翹首程門時切溯洄仰止之想日承老夫子手示得悉近祉清和私心忻怵但以饒顛一帶早魃爲憂龍江課額致厯清思捧讀一過不勝依結所可慰藉者恃老夫子鴻福所庇自然秋濤乍至可藉天休以裨國計幸勿以一時課額焦勞也豐自數月以來夙興夜寐期於無負生成自分庸流鈍質才短學疎謬廁清班撫躬惶悚每思古人讀書立業輒期努力自愛但恐愚昧無知不克進步蒙老夫子不棄樗材賜之

教誨真字字金石頓然開拓心胸敢不書紳佩服朝夕
勿諉長安習俗移人深可戒省况在冷暑冰寒之地惟
有甘淡泊耐勤苦力行困學庶幾勿憂隕越若稍有縱
逸不第喪名亦且伐性自當奉夫子之訓必不敢出此
也葭蒼露白極目南雲惟望天上嗣音時時郵寄不啻
親承提命矣夢稟嵩烈三門生處當肅將意旨來人行
促不盡縷私臨稟曷勝瞻依之至孫在豐載頓首
老夫子駕駐武林門人誼應陪侍函丈乃以俗冗暫時
返棹心甚不安綠暗紅稀春光漸老若雪間風景猶可

及時覽勝望前嵒候老夫子命駕門人謹掃徑鵠竢也
此稟未盡門人在豐頓首

絳帳南來湖山生色獨是門人治裝匆遽種種疎節未
得時時隨侍負罪悚惶惟恃老夫子大人慈照曲賜垂
宥也清秋爽氣師駕臨茗家嚴於郡城做廬掃徑以候
門人初八日長行矣舟過任城當圖趨至闕里叩候太
師母大人師母大人萬安也舟次留稟不盡願言門人
名正肅

昨歲仲冬之望敬接老夫子手示知絳帷暫駐維揚卽

臨虎阜隨於臘月之朔先尚人在蘇候信俟師駕一到
吳門卽拉全馮門人前驅負弩候至望間未得確音至
除夕信來始知騶從過蘇於婁東署中度歲獻歲卽欲
鼓棹叩謁因月內每有萬不得已之應酬須至月初乃
得出門昨托徐彥和先爲致稟惟期老夫子慈照二月
上旬門人適赴蘇臺趨至婁東晉叩函丈未審尊馭尙
駐婁東抑至金閭晤當事也肅此稟候萬福食物不腆
奉之從者并乞慈鑒晒存臨稟悚息門人名正肅
命使遠臨叩讀老夫子手示具詢太師母大人起居萬

安老夫子孝履清和師母世兄益獲安吉深慰依依去
秋苦次荒迷不能匍匐前赴太夫子靈几僅遣价馳奠
北望搏顙中心負疚如何可言繼蒙老夫子回示知於
仲冬舉襄事其時亦爲先慈營窻不得趨事執紼又無
羽便未由寄將寸衷罪戾至今夢寐靡盬也先慈於正
月元旦歸窻諸事荒率動不如禮併不敢以具聞真抱
無涯之憾也伏承隆莫賜以鴻章謹對使百叩敬薦几
筵家嚴仰藉福庇幸健飯如常晨昏子舍聊奉菽水歡
回思世途塵網不覺冷若寒灰第君恩師誼高厚未酬

恐亦不堪鞭策尙望老夫子示以桀誨也明歲專候絳
帳南來隨侍左右罄寫悻誠門人廬次無狀杜門掃跡
久已不出戶庭近於小祥後至吳門謝弔寓邸捧接台
函旅次荒涼褻使者附帛貳種伏惟照存別諭趙姓卽
諄囑當事照拂肅泐復謝臨稟惶悚感切之至制孫在
豐稽首

余進士雲祚

余雲祚謹稟老夫子臺座前雲祚自庚戌之秋勝違函
丈倏爾十度星霜遙瞻夫子純嘏天錫道德日崇可勝

怵慶癸丑舍弟公車回獲捧琅玕如親提命嗣後鄉園
氛擾里道悠阻久疎音問迨戊午初春祚抵都門始悉
老夫子讀禮珂里未遑躬候抱歉殊深茲以聽選留滯
燕邸萬里萍浮蕭然囊橐尙未知所稅駕惟冀夫子超
晉崇階爲之指南耳邇聞仲澍張門兄道及老夫子指
日榮補不次之擢拭目可俟頃因張子赴任入楚順道
歸里特肅荒函上候萬福臨稟曷任瞻馳雲祚再頓首
稟

顧二榮 俟考

恭謁老師座下辛亥迄今倏逾三載客歲曾布手奏一
緘附致同學袁向若先生轉達函丈以少申謝悃諒蒙
電照不敢再贅嗣欲緝候又自揣一介故吾無以上答
高厚畏瀆清嚴輒爲中止然而嚮往之私誠結於中不
能自己敢自外乎伏念風會維新帖括一道駸駸乎日
趨於古皆繇庚戌南宮師臺力任起衰諸鉅公又從而
應之一時闡牘煥然復古遂爲三十年中之所僅見是
以子丑兩科相繼迭盛不可謂非斯文之大幸也以愚
揆之今日者猶有文行本末之說所當亟爲講究者爾

夫六經四子之書所以明道也道明於上則教化興道
明於下則人心正教化興人心正而太和在宇宙間矣
迨道德流爲文字其間風氣之升降有難以悉舉者而
惟好古學道之士必欲起而維持之何也其所言者皆
其所行者也不然史漢之風神八家之論說苟以材智
自擅者莫不發憤爲雄窮年矻矻以求快夫胸臆而究
其所至亦足以自名一家第攷諸踐履寡當焉蓋徒務
乎其末而本之不立故也至若廓清功利之私滌蕩虛
浮之習一切邪說小慧與訓詁記誦之陋俱不足以溺

之而奮然振拔於流俗之中惟以躬行心得者發明聖賢之蘊此其志非猶夫人之志其業非猶夫人之業可知也求之當世不知誠有其人焉否歟使有之則其修辭立誠敦本積行所關於風教者爲何如乎愚知師臺與起大化扶進人倫未有不樂得其人以與之朝夕者也二榮蓋竊有志於此而恐恐乎愧所學之不克逮焉雖漸摩攸及亦歷有年所而龍江一謁未罄心期乃荷師臺一旦收而登之門墻之列稱隆遇矣夫豈易邁者哉矧非有夙昔之雅信諸生平則其爲人之賢不肖固

未之知也而二榮又不欲急急自鳴其志之所存而師臺拂拭勤懇加於等倫者意謂其人之可以有造以庶幾適道之一日耶抑二榮之所遇者猶在形迹之間而師臺之所鑑者已在有意言之表乎榮每於平昔反求之際自念功利之私何以廓清之必盡虛浮之習何以蕩滌之無餘邪說之不敢遽聞小慧之未能悉忘訓詁記誦之結習未易且夕之畢化則躬行心得者未可以自信而自安也是非躬承聖緒者提命於前無繇達矣今者幸遇師臺宏克復之世學明博約之心傳進小子而

卷之三
三
裁之以底於明道之歸此自昭代所希有而先聖人以
後二千餘年振興絕學之一日也因不揣固陋敬布愚
衷伏懇師臺賜以明訓飾以條章二榮雖昧劣敢不殫
力奮志冀無負於師臺之厚期也茲有神鋒近選上呈
法鑒其中甘苦所歷已於評語稍一露之不審有當與
否祈公餘之暇間賜斧削俾小子知所從事為禱近聞
內院熊先生昌明斯道振起未學必與師臺夙有官商
之應其語言文字流播左右者并祈賜觀一二以慰想
慕以襄志學何如臨楮可勝悚惶翹切之至璧翁孔先

生季翁老先生祈此名一候不敢另啓并懇門人顧二
榮百拜

張贊善烈

門生迂疎之質謬蒙 聖恩出於意外實皆吾夫子餘
庇也史事重大學識難周深望夫子時時指示之俾勿
貽譏千古則至幸也河間大節乞夫子備錄顛末見示
試卷并彭年兄卷呈覽題難而出於倉卒門生僅能切
題殊乏藻麗恐未可令人見也詩文向無刻集今似必
不可少謹畧抄數首敬求夫子刪正倘有可存乞夫子

卽賜弁言爲重如不足問世亦候夫子直教不復敢災梨棗矣願望教音不勝翹切伏候太師母師母世兄闔宅全福未罄欲言

拜別函丈倏已年餘太夫子窀穸之事莫克躬親負士罪戾已多又不能一介專馳代叩階下依依南望徒渺寤思邇白門生相要正擬藉鴻恭候乃忽蒙師諭遙頒慇懃垂問拜讀之際感媿交并因詳請老師台履太師母師母世兄闔府全祉私慰下懷非言辭所能盡也門生拙滯如故絕望通顯今七月十八日服闋計驗到之

日居前者不啻百餘人萬無補理雖禁錮盛世不能無慨於中然竊念古者爲己之學缺陷良多應無暇較計榮枯也春間荷任楊兩先生疏薦出之意外揣分難當今部催甚迫門生尙在制內不能恭與盛典卽使考在制外詩賦素非所長今方舍田芸田全無揣摩萬不能得當門生年五十七矣非復馳逐康莊之時念服除後惟有編蓬環堵彈琴而咏先王之風此不禁人自爲之者勿爲不肖以遺宮墻羞卽所以仰報造就恩者尙望夫子指示教戒之也恪具不腆藉手拜獻無足齒及伏

祝老師孝履清勝未一
世殊遽罹此變慘切之極卽欲趨庭恭慰阻雨遲遲罪
也暑中尙望老夫子寬解自重是祝捧諭祭用綾帳稱
皇清待贈孺人李家婦亡女之靈此兩項似無可易至
主祭書名似止宜老夫子率世兄而祖母暨母哀意具
於文內不必列稱於前京俗有內眷另爲一帳列書某
氏雜懸衆帳之內非縉紳禮也若師伯可列老夫子之
前而祭文仍夫子自語固無碍也草畧無當惟裁確請
益門生薄奠亦在二三日內附此稟知烈再頓首

正月內四師叔惠顧敝齋捧讀賜札知老夫子闔宅納
祉不勝欣慰門生試事尙未有期春來病眩蓋積勞所
致今少愈尙弱求能畢事足矣不敢有他望也小兒偶
倖鄉闈荷夫子骨肉至愛喜溢於詞雖烈私心亦亟望
焉但恐德薄福淺未知能仰副至意否耳不腆一卮遙
祝岳降輶褻之罪實歉於心殊卷六冊敬呈夫子教示
並呈師伯師叔世兄教小兒受知於孫貞子父母甚切
胥麓庵有力焉合房則陳椒峯行人也并附以開臨池
曷勝翹企烈再頓首

伏惟老夫子不以烈爲不足教示以著書俾之參閱烈
反覆尋繹聞所未聞精詳慎重異乎世之汎爲著述者
雄邁邁逸不惟遠過近代文人而末篇攻闢異端究極
原委卽歐公本論有不能及然夫子非爲文也爲明道
也道在詩書患在不著不察守訓詁以沒聰明讀斯編
者如震聾發蒙使之瞿然而顧庶幾新智日生於聖道
有所省入乎其以嘉惠後學甚厚顧其中最大節目惟
格物二字而烈之愚闇尙有未能遽愜於心者誠以程
朱立說皆沉涵出入躬行心得數十年而後灼見無疑

者其言平實精確如布帛菽粟之不可易蓋聖學攸關
非徒爭文義也自宋元以下學者智深勇沉無跂及近
似二夫子者夫學力不及什一而一旦欲易其說是以
心悸而不敢出也先惟精後惟一先擇善後固執萬古
聖學止此定本倘謂窮理之先又在去私克己似仍是
誠意之事而所謂虛能生明鑑物不爽又似心正以後
時矣至於上增窮字下增理字陽明曾有是言夫釋經
之法上增一字下增一字者多多矣可勝譏乎卽曰格
去物累不上增一去字下增一累字乎然此猶就文義

論也實就聖學體之則聞見擇識學問思辨卽孔門最先從入之功未可謂窮理之先又有扞去物累一節也烈之愚滯不化如此惟夫子有以教之其他字句訓釋異同似無關大道竊意前人非不見及特擇而不用耳而烈更有隱憂焉明代前百五十年天下無敢非議朱註者其時繩矩嚴而士心樸天下賴以治平及陽明發難浸淫五六十年至萬歷之世人人操戈以向朱子刺剝無完膚今迴觀其時人心世道何如哉天下淪胥以亡由學術裂而人心壞也我朝乙未戊戌以後天下始

復崇朱註如濃霧撤而朗日開羣遊乎蕩平正直之途也奈學者不能深識力行而特務和合朱陸以資口談或兩是之或兩非之正學之不能赫赫中天也殆未知所終當是時發明表章之不暇而又從而指摘之愚心竊怵惕焉恐不善讀者失夫子虛衷訂證之意而競以菲薄前人爲事將議論紛紛復如向日之所爲如之何其可歎且萬歷以來學者姑恕一孔子而於孟子切切動齒唇焉竊歎孟子救世大指如夫子所論首章功不在禹下者學者胡弗表章發明服膺而施行之至一二

疑端不以辭害意姑闕之可也伏讀伐齊桃應二論深
識遠見孟子無以應矣而愚心又惻惻然以爲父母語
意未周子且反覆而辯詰焉使父默然無以應恐子未
可以稱快而反有大不安於心也夫子幸惠教弟子何
敢妄言抑夫子欲明道也虛懷再四以能問於不能故
敢布其所疑附事師無隱之義望夫子詳教之門人烈
再頓首

烈鄙妄無似老夫子不卽棄其愚而諄諄申誨之諷誦
再三真如坐春風中始覺聖道之廣大而專已守殘者
之不足以語學也從此從容紬繹倘因夫子之至教以
畧有所窺凡有可請益於夫子者仍望始終開示之生
平佩服無既矣先此申謝伏冀俯垂鑒悉不宣門人烈
再頓首

馮中書遵祖

馮遵祖謹稟夫子大人台臺自離左右又兩月有奇矣
閱小抄知夫子駕臨三衢未知何日台旌東返也遵祖
貧病杜門雅志希顏篔簹陋巷殆將終身不敢學昌黎
頻上執政之書意欲師虞卿稍作白蟬之蠹倘天假之

緣若得集成亦可稍報夫子知遇於萬一但歷遭荒旱
又值軍興亟賦之時間讀劉炫王孝籍諸君子立大隋
之朝文章名譽焯焯一代猶未敢忘輸稅之苦况於么
微乎但蝸舍悲涼問猪肝之無日駒鞭迎疾歎鳳沼於
何年生當盛世 聖天子每飯不忘班馬布衣皆賜金
魚遵祖獨爲崔亭伯之不辰馮敬通之無命此所以顧
瞻形影而悲從中來者也嘗聞窮則呼天病則呼父夫
子遵之天與父也能不怒焉而呼也自庚戌及門中思
之孫子馳驟於天衢白子得人於閩海張子逞步於玉

堂其他屠李諸子分符於花縣其間不幸溘逝者二人
矣遵祖上不能備清華顧問之選下不得民社簿書之
榮雖尙視息與死何殊乎而近且數十口之米鹽四五
載之逋負對此空衙能不落淚惟夫子之前遵祖迺敢
述其苦境他人之側不言非不能言言之無益非唯無
益恐亦如柳子厚之言告冠者詫其爲與我無與也嘉
禾陸年兄諱冀英向宦粵東今赴京候補景仰夫子囑
遵先容以贅龍門惟夫子剪拂使其長鳴遵祖沾榮矣
外詩兩章附上筆已得佳者月初崙上遵祖稟

馮遵祖稟夫子大人台臺遵祖兩附稟函想塵尊前矣
十一月初有濶中紀友傳台命促遵入都深荷天地父
母之恩但遵訟平之後資斧無出不得已上會稽又垂
橐而返今在萬分拮据但若中景况夫子所悉一二親
友皆於加納時相累今難再啓齒此種苦情前二稟所
未及也茲因于勝翁先生之便再致稟候于公治若十
七載善政難罄卽如寅卯之間躬擐甲冑掃滅萑苻以
活窮巖若中萬戶口碑如一今來代覲必謁夫子伏唯
多方噓植并吾鄉大老亦望夫子便晤時及之遵爲千

萬戶起見非阿私也又歸安何紫翁父母治邑十載瀝
血飲水湊當藩亂催字兼勞其才其守夫子在若固所
目擊况歸安自 天朝定鼎以來從無陞遷一人何公
之賢良公道不泯已報最內轉乃以奸胥侵移以因公
之過計典波累雖公論在人尤望夫子主持終始俾廉
吏可爲循賢不枉亦非一官起見也外附拙稿兩冊先
呈台削因未竣事魚豕多訛集成再奉師席遵祖論史
自遷固至五代歐鈔已成二千餘論目下正論趙宋
朝廷敦重史館若論上下百代亦堪一助惜蟠木朽枝

無先容者此卞和所以抱玉而泣也夫子其莞爾一笑
否入春拮据就道以展立雪臨稟激切之至遵祖載稟
馮遵祖敬稟夫子大人恩臺遵祖於前冬荷夫子使命
之至愧恨欲絕其苦情知使者悉之台左矣昨冬聞駕
抵吳中卽擬走謁至新正三日孫門生手札云夫子維
揚度歲頃二十日遣兒到蘇奉迎未得確耗小僕走崑
山徐彥翁年兄處偵詢方知夫子行館在雲間又云夫
子不日到做罷之做省三竺六橋之間拱候仙舟又恐
夫子久逗茸城先遣小僕上叩左右若夫子果至武林

遵飛棹立雪惟夫子諭以的期感感荒芹不腆登之別
楮十年家食種種悲涼雖夫子亮之然中心如焚也遵
祖臨稟激切遵祖拜稟

張明府爲煥

舟行後風甚烈深切懸念舟子歸知於申刻到茸慰慰
續接老夫子手諭知旌旆將指上洋聞主人頗多情且
有張太夫子在彼遊道定佳可預卜也吳門之行似不
宜遲但聞撫軍已公出姑俟回署日過往可耳老夫子
恩重如山每承肝鬲教言等於骨肉私心感激寤寐以

之日者更荷垂念北行多方區畫天高地厚有非言詞所能鳴謝萬一者此間倘有可圖當飛信奉聞祇恐機緣難定耳花期想在月杪願候老夫子蒞婁當掃徑以待也劉公札已送紫翁閱過併繳到謹此附稟統惟慈鑒不宣

小价歸拜讀老夫子手諭勤勤懇懇不啻耳提而面命之謹鏤心版夙夜佩服更承曲賜軫念於大夫子處特囑照庇真所謂大德難酬罔知所報者也爲煥於十一日北發匆匆戒塗弗獲恭候老夫子旋旆面申叩別中

心戀慕惶仄無已李周兩先生在荒園種種疎簡負罪良多或恃老夫子涵亮不深督過耳爲煥自蒙恩知遇以後敬守祖父家訓兢兢修飭砥礪廉隅饘粥守貧固其常分往者竊不自揣竭蹶捐納囊空如洗此番治行百計告貸十無一應草草拮据內顧徬徨有所未暇計也老夫子生成厚恩如天如地仰承明訓永矢勿諉將來倘得稅駕之地自當勉策駑鈍益自被濯以副老夫子屬望盛心或亦仰報知顧之一端也老夫子赴都諒亦不遠爾時尚可隨侍函丈親承音旨邀沐厦覆正自

無窮百凡統惟存注禱切禱切吳門諸當事果亭舍親
已曾致過此遊亦未宜遲也舟次附稟不盡瞻依

單使至知老夫子問渡虎林柳洲亭畔天竺峰頭佳景
無限盡入奚囊矣爲煥深慚鹿鹿弗獲追隨杖屨然時
時瞻念輒爲神往不置也荒園紫藤正放敬候老夫子
飛棹見過少供清賞竚切竚切近者接得做同年一札
知改授已有成說爲煥卜於次月初二北行本擬躬叩
龍門拜別就道而治裝匆遽未遂瞻依懸懸此心可勝
戀結倘老夫子卽返婁江恭聆提命固所深願如或台

冗未暇惟望老夫子曲賜指南凡可爲之地者仰祈殫
心籌畫多惠數函俾得邀鴻覆始終皆生成之賜矣聞
郭子齊河一缺頗爲不佳前蒙老夫子面商轉移之計
恐未必有濟也如何如何王子旋里將及數天知咫尺
台旌瞻仰殊切刻下經營就任想爾時當圖晉謁耳肅
此稟候特遣小价泥首伏祈迅惠德音翹禱翹禱臨風
遙企曷任依依

顏氏家藏尺牘卷三終

